

WAJTAOA

I TALEMAOT KINGDOM BLONG JEHOVA



STADI LONG WIK BLONG

1-7 JULAE

**Yumi Mas Mekem Wok Ya
Blong Talemaot Gud Nius**

PEJ 3 • SINGSING: 103, 102

8-14 JULAE

**?Yu Yu “Strong
Blong Mekem
Oi Gudfala Samting”?**

PEJ 8 • SINGSING: 108, 93

15-21 JULAE

**Fasin Blong Toktok Gud
Tugeta i Mekem Mared
i Stap Strong**

PEJ 14 • SINGSING: 36, 87

22-28 JULAE

**Oi Papa Mo Mama,
Mo Oi Pikinini, Yufala
i Mas Toktok Gud**

PEJ 19 • SINGSING: 88, 3

29 JULAE-4 OGIS

**Yu Mas Lukaotgud
Long Presen Ya We God
i Putum i Stap Blong Yu**

PEJ 26 • SINGSING: 14, 134






LONDON, INGLAN

PIJA LONG FRAN PEJ: Wan sista i yusum ol buk long lanwis blong Gujarati blong prij long wan man blong stoa long notwes blong London

■ Ol Kongregesen We Oli Toktok Narafala Lanwis
■ Ol Grup We Oli Toktok Narafala Lanwis



SAM NARAFALA HAF

13 Kwestin

24 Laef Blong Mifala i No Blong Nating Nomo

31 Sam Stori Blong Bifo

WAJTAOA STADI

■ Yumi Mas Mekem Wok Ya Blong Talemaot Gud Nius

Stadi ya bambae i soemaot from wanem yumi mas talemaot gud nius long ol man. Mo tu stadi ya bambae i givhan long yumi, olsem wanem blong mekem gud wok ya blong talemaot gud nius.

■ ?Yu Yu “Strong Blong Mekem Ol Gudfala Samting”?

Stadi ya bambae i soemaot tu rod olsem wanem ‘strong tingting we yumi gat blong mekem ol gudfala samting,’ i save givhan long yumi blong pulum ol man oli kam long Jehova. (Taetas 2:14) Wan rod blong mekem olsem, hemia taem yumi mekem wok ya blong talemaot gud nius. Mo narafala rod, hemia taem yumi mekem ol gudfala fasin.

■ Fasin Blong Toktok Gud Tugeta i Mekem Mared i Stap Strong

■ Ol Papa Mo Mama, Mo Ol Pikinini, Yufala i Mas Toktok Gud

Fasin blong toktok gud wanples i impoten blong mekem mared i hapi mo i mekem famle i harem gud. Fas stadi i soemaot ol gudfala fasin we i givhan long yumi blong toktok gud wanples. Namba tu stadi i soemaot olsem wanem blong winim ol samting we oli save blokem ol pikinini blong oli toktok gud wetem ol papa mo mama blong olgeta.

■ Yu Mas Lukaotgud Long Presen Ya We God i Putum i Stap Blong Yu

?Wanem presen ya we God i putum i stap blong ol Kristin? ?Yumi save lanem wanem long stori blong Esao? ?Wanem ol samting we oli save givhan long yumi blong mekem ol desisen we oli waes, long saed blong presen we God i putum i stap blong yumi? Bambae yumi faenem ansa blong ol kwestin ya long stadi ya.



YUMI MAS MEKEM WOK YA BLONG TALEMAOT GUD NIUS

“Yu mas mekem wok ya blong talemaot gud nius blong Kraes, mo yu mas finisim olgeta wok ya we God i givim long yu blong mekem.”—2 TIM. 4:5.

?BAMBAE YU YU ANSA OLSEM WANEM?

?Hu ya ol man blong talemaot gud nius?

?From wanem yumi mas talemaot gud nius long ol man?

?Ol man blong talemaot gud nius oli mas mekem wanem?

JEHOVA GOD i faswan mo i nambawan man blong talemaot gud nius. Smoltaem afta we Adam mo Iv tufala i agensem Jehova, Jehova i talemaot gud nius ya se i no longtaem Setan bambae i lus. (Jen. 3:15) Longtaem finis, Jehova i pulum ol man blong oli raetemdaon olsem wanem bambae hem i mekem nem blong hem i kam tabu. Hem i talemaot olsem wanem bambae hem i stretem trabol we Setan i mekem, mo olsem wanem ol man oli save kasem samting we Adam mo Iv tufala i bin lusum.

² Ol enjel tu oli stap talemaot gud nius, mo oli givhan long ol narafala man blong oli talemaot gud nius. (Luk 1:19; 2:10; Wok 8:26, 27, 35; Rev. 14:6) ?Olsem wanem long Maekel we i jif blong ol enjel? Taem hem i stap long wol, hem i tekem nem ya Jisas. Long taem ya, hem i soemaot fasin we ol man oli save folem, taem oli talemaot gud nius. !Yes Jisas i yusum gud laef blong hem blong talemaot gud nius!—Luk 4:16-21.

³ Jisas i talem long ol disaepol blong hem se oli mas go talemaot gud nius long ol man. (Mat. 28:19, 20; Wok 1:8) Aposol Pol i talem long Timoti se: “Yu mas mekem wok ya blong talemaot gud nius blong Kraes, mo yu mas finisim olgeta wok ya we God i givim long yu blong mekem.” (2 Tim. 4:5) ?Wanem gud nius ya we yumi stap talemaot? Hemia gud nius ya se Jehova i lavem yumi tumas. (Jon 3:16; 1 Pita 5:7) Wan rod we Jehova i yusum blong soemaot se hem i lavem yumi, hemia Kingdom blong hem. From samting ya, yumi glad tumas blong talemaot long ol narafala se oli save kam fren blong Jehova sipos oli sapotem rul blong Kingdom, oli obei long God, mo oli mekem samting we i stret. (Sam 15:1, 2) Yes, stamba tingting blong Jehova hemia se bambae hem i

-
1. ?From wanem Jehova i faswan mo i nambawan man blong talemaot gud nius?
 2. (1) ?Ol enjel oli joen long wok blong talemaot gud nius olsem wanem? (2) ?Taem Jisas i stap long wol, hem i soemaot wanem long ol man?
 3. (1) ?Yumi stap talemaot wanem gud nius? (2) ?Wanem ol kwestin we i gud yumi faenem ansa blong olgeta?

finisim ol nogud fasin we oli mekem ol man oli harem nogud. Bambiae hem i finisim fasin safa we Adam mo Iv tufala i pasem i kam long yumi. !Hemia wan gudfala nius! (Aes. 65:17) I gud we yumi tingbaot ansa blong tufala impoten kwestin ya: ?From wanem yumi mas talemaot gud nius long ol man? ?Yumi save mekem gud wok ya blong talemaot gud nius olsem wanem?

?FROM WANEM YUMI MAS TALEMAOT GUD NIUS LONG OL MAN?

4 Yu traem tingbaot samting ya. Wan man i kam talem long yu se papa blong yu i lego yu mo famle blong yu. Man ya i talem se hem i save gud papa blong yu. Hem i talem se papa blong yu i no save joen wetem narafala, hem i stap haedem ol tingting blong hem, mo hem i strong tumas long ol man. Mo maet sam narafala oli talem se i no nid we yu traem toktok wetem hem from we hem i ded finis. ?Bambiae yu yu harem olsem wanem? Blong talem stret, hemia nao samting we plante man oli talem long saed blong God. Oli ting se God i strong tumas long ol man, mo oli ting se man i no naf blong kasem save long hem. Sam lida blong skul oli talem se God bambiae i panisim ol rabis man, long wan ples we oli stap harem nogud long hem blong olwe. Sam narafala oli talem se God nao i mekem ol man oli harem nogud long taem blong disasta. Oli talem se God i mekem ol disasta blong panisim ol man, nating se ol disasta oli spolem ol gudfala man wetem ol nogud man.

5 Sam narafala oli talem se i no gat God nating. Plante man we oli bilif strong se laef i kamaot olsem nomo, oli talem se olgeta samting oli kamaot olsem nomo. Samfala oli ting se man i kamaot long anamol, taswe hem i gat fasin olsem ol anamol. Oli talem se ol nogud samting we oli stap spolem

4. ?Ol man oli talem wanem long saed blong God?

5, 6. ?Tingting ya se laef i kamaot olsem nomo mo ol giaman tijing, oli mekem wanem long ol man?

ol man, oli kamaot nomo from loa we i bos long ol samting raonabaot long yumi. Taswe, plante man oli bilif se ol nogud samting bambiae i kasem yumi oltaem nomo. From samting ya, olgeta we oli bilif se laef i kamaot olsem nomo, oli no save se laef blong olgeta long fiuja bambiae i olsem wanem.

6 I tru se long ol las dei ya, ol giaman tijing mo tingting ya se laef i kamaot olsem nomo, oli mekem ol man oli harem nogud. (Rom 1: 28-31; 2 Tim. 3:1-5) Ol tijing ya oli no givim wan gudfala nius long ol man. Be oli pulum ol man oli go longwe long God mo long gud nius ya blong hem.—*Ridim Efesas 4:17-19.*

7 Wan man we i wantem fren gud wetem God, hem i mas save se Jehova i laef i stap. Mo hem i mas save se sipos hem i kam klo-sap long God, samting ya bambiae i mekem i gud long hem. Be blong givhan long olgeta blong oli kasem ol save ya, fastaem yumi mas halpem olgeta blong oli faenemaot samting we Baebol i tijim. Yumi save givhan long olgeta blong oli faenem ansa blong ol kwestin we oli gat long saed blong God. Yu save yusum buklet ya, *!Gud Nius We i Kamaot Long God!* Yumi save pulum olgeta blong oli tingbaot ol kwestin ya: ?Ol dedman bambiae oli stap olwe long beregraon? ?God i letem fasin nogud i stap blong wanem?

8 Beswan rod we yumi save folem blong givhan long ol man blong oli kasem save long God mo stamba tingting blong hem, hemia stadi long Baebol. Yumi glad tumas we yumi save givhan long ol man, blong oli faenem ansa blong ol kwestin blong olgeta. Sipos yumi wantem kasem hat blong ol man, i no naf blong talemaot gud nius nomo long olgeta, be yumi mas pulum olgeta blong oli bilif. (2 Tim. 3:14) Yumi save mekem olsem sipos yumi folem fasin blong Jisas. ?From wanem? Hemia from we hem i yusum gud ol kwestin. ?Yumi save folem fasin blong hem olsem wanem?

7, 8. ?Wanem beswan rod blong givhan long ol man blong oli kasem save long gud nius?

Sipos yumi wantem kasem hat blong ol man, yumi mas pulum olgeta blong oli bilif

YUMI MAS YUSUM GUD OL KWESTIN

⁹ ?From wanem yumi mas yusum gud ol kwestin taem yumi stap talemaot gud nius? Yu traem tingbaot se yu go luk dokta from we yu sik. Dokta i talem se hem i gat sam gudfala nius blong talem long yu. Hem talem se hem i save winim sik blong yu, sipos hem i katem yu. Maet yu trastem hem. Be sipos dokta i no askem kwestin long yu long saed blong sik blong yu, be hem i girap, i talem nomo se bambae oli katem yu, ?olsem wanem? ?Bambae yu yu trastem dokta ya? Ating nogat. Long sem fasin, sipos yumi wantem givhan long ol man blong oli kam fren blong God, yumi mas save olsem wanem blong askem ol gudfala kwestin. Biaen, yumi save givhan long olgeta.

¹⁰ Jisas i save se sipos yumi yusum gud ol kwestin taem yumi stap tijim man, hemia i givhan long yumi blong savegud man ya. Be i no hemia nomo, fasin ya i pulum man ya tu blong i joen long storian. Wan taem, Jisas i wantem tijim ol disaepol blong hem se oli mas mekem tingting blong olgeta i stap daon. Ale hem i askem wan kwestin long olgeta we i mekem oli tingting. (Mak 9:33) Wan narafala taem, Jisas i wantem tijim Pita blong i save mekem desisen we i laenap wetem tingting blong God. Ale hem i askem wan kwestin mo i talem tu ansa long kwestin ya, nao hem i askem long Pita blong i ju-

⁹. ?Yumi mas mekem wanem blong givhan long man blong i kam fren blong God?

^{10, 11}. ?Sipos yumi folem fasin blong Jisas blong tij, bambae yumi kasem wanem gudfala samting?

sum weswan long tufala i stret. (Mat. 17:24-26) Long wan narafala taem, Jisas i wantem save samting we i stap long hat blong ol disaepol blong hem, ale hem i askem kwestin we i pulum olgeta blong talemaot tingting blong olgeta. (*Ridim Matiu 16:13-17*.) Taem Jisas i mekem olsem, hem i talem samting we i mekem i gud long ol man, mo we i pulum ol man blong oli bilif long gud nius.

¹¹ I gat tri samting we yumi save mekem blong folem fasin blong Jisas. Yumi save luk-save olsem wanem blong givhan gud long man, yumi save ansa long man we i talem sam tok blong blokem storian blong yumi, mo yumi save tijim ol man we tingting blong olgeta i stap daon, blong oli luk olsem wanem trutok i save givhan long olgeta. Bambae yumi tokbaot tri eksampol we oli save givhan long yumi, blong yumi yusum gud ol kwestin we oli save givhan long man.

¹² **Faswan eksampol:** Sipos pikinini blong yu i talem long yu se hem i no save eksplenem bilif blong hem long fren blong hem, ?bambae yu yu mekem wanem? ?Bambae yu daonem hem? ?Bambae yu kwik blong givim advaes long hem? Nogat. Ating bambae yu wantem givhan long hem blong i no fraet blong talemaot gud nius. Taswe, i gud yu folem eksampol blong Jisas blong askem kwestin long pikinini blong yu, blong pulum hem blong i talemaot tingting blong hem. ?Yu save mekem samting ya olsem wanem?

¹³ Afta we yutufala i ridim ol haf blong buklet ya, *!Gud Nius We i Kamaot Long God!* yu save pulum hem blong i lukluk ol kwestin long las pej blong buklet ya. Mo yu askem long hem blong hem i talem wanem kwestin we hem i wantem tokbaot. Yu letem hem i talemaot from wanem hem i jusum kwestin ya mo olsem wanem bambae hem i eksplenem haf ya long fren blong hem.—Rom 12:2.

¹²⁻¹⁴. ?Yu save mekem wanem blong givhan long pikinini blong yu, blong hem i naf blong talemaot gud nius? Yu talem wan eksampol.

Ol gudfala kwestin . . .



1 | oli givhan long man blong i luksave from wanem hem i bilif olsem



2 | oli givhan long man blong i kasem save long gud nius



3 | oli givhan long man blong i luksave se samting we hem i lanem i tru

¹⁴ I gud we yu talem long pikinini blong yu blong i folem fasin blong yu, blong eksplenem bilif blong hem long fren blong hem. Ale maet, hem i save askem long fren blong hem blong i lukluk long Stadi 6, mo i ridim fas haf blong kwestin 2 se: ‘?Wanem i hapen long man taem hem i ded?’ Nao pikinini blong yu i save askem se: ‘Taem Lasaros i laef bakegen, ?hem i tokbaot ol samting we i hapen long hem taem hem i ded?’ Ating fren blong hem bambae i talem se nogat. Biae hem i save talem se: ‘Taswe, i stret nomo blong bilif long tok ya blong Bae-bol se taem man i ded hem i no save wan samting.’ Biae, yu save mekem wan pleplei wetem pikinini blong yu, blong givhan long hem blong i naf blong talemaot bilif blong hem long ol fren blong hem. Yu yu mekem olsem wan yangfala long klas blong hem, mo hem i traem askem sam kwestin long yu. Sipos yu tijim pikinini blong yu blong i yusum gud ol kwestin blong ansa long wan fren long skul, yu stap givhan long hem blong i mekem gud wok ya blong talemaot gud nius.

¹⁵ **Nambatu eksampol:** Taem yumi stap talemaot gud nius, yumi faenem sam man we oli bilif se God i stap panisim ol man, taem hem i letem olgeta oli stap harem nogud. Sipos yumi faenem wan man olsem, i gud yumi askem long hem long kaen fasin se: ‘?Wanem i mekem se yu yu gat tingting olsem?’ Afta we hem i talemaot tingting blong hem, i gud we yumi talem tangkiu long hem. Yumi save askem long hem sipos hem i glad blong ridim wan buk we i eksplenem from wanem God i letem fasin nogud i stap. Sipos hem i glad blong lesin, bambae hem i agri blong ridim buk ya. Biae, yumi save givim buklet ya, *!Gud Nius We i Kamaot Long God!* Sipos yumi yusum gud ol kwestin, mo yumi askem ol kwestin ya wetem kaen

15. ?Yumi save yusum kwestin olsem wanem blong givhan long man we i bilif se God i stap panisim ol man, taem hem i letem olgeta oli harem nogud?

fasin, bambae yumi naf blong givhan long ol man blong oli kasem save long gud nius.

¹⁶ **Nambatri eksampol:** Taem yumi mekem Baebol stadi long wan man, maet yumi askem long hem blong i ridim ansa long buk. Be sipos yumi mekem olsem, yumi no stap givhan long studen ya. ?From wanem? From we sipos studen ya i ridim ansa nomo be i no tingting dip long hem, bambae bilif blong hem i no strong. Nao taem ol man oli agensem hem, bambae hem i no moa gohed gud. Hem i olsem wan tri we i gru long ples blong ston, nao rus blong hem i no go dip long graon. Ale, taem san i bonem hem, hem i kam drae. (Mat. 13:20, 21) Sipos yumi wantem se Baebol stadi ya i stanap strong, yumi mas askem long hem blong i talemaot tingting blong hem long ol samting we hem i stap lanem. I gud we yumi askem long hem, sipos hem i bilif long ol samting we hem i stap lanem. Mo i impoten we hem i talemaot from wanem hem i bilif long sam samting, be i no bilif long sam narafala samting. Bienen, yumi givhan long hem blong i tingting long ol vas blong Baebol, blong bambae hem i naf blong luksave se samting we hem i lanem i tru. (Hib. 5:14) Sipos yumi yusum gud ol kwestin, bambae bilif blong ol man we yumi tijim olgeta i kam strong. Nao oli naf blong stanap strong, taem ol man oli agensem olgeta mo oli pulum olgeta blong mekem samting we i no stret. (Kol. 2:6-8) ?Wanem narafala samting we yumi save mekem taem yumi talemaot gud nius?

YUMI MAS GIVHAN LONG NARAFALA

¹⁷ Jisas i sanem ol disaepol blong hem oli go tutu long wok blong prij. (Mak 6:7; Luk 10:1) Bienen, aposol Pol i tokbaot ol man we 'oli wok strong wetem hem long wok blong

^{16.} ?From wanem yumi no mas askem long studen blong i ridim ansa long buk?

^{17, 18.} Taem yu wok wetem narafala long wok blong prij, ?yu save mekem wanem blong yutufala i wok olsem wan tim?

gud nius.' (Fil. 4:3) Folem ol tok ya blong Baebol, long yia 1953, ol man blong God oli statem wan program, we ol pablisa oli go tutu long wok blong prij.

¹⁸ Taem yu wok wetem narafala long wok blong prij, ?yu save mekem wanem blong yutufala i wok olsem wan tim? (**Ridim 1 Korin 3:6-9.**) Taem narafala pablisa we yu prij wetem hem i stap ridim sam vas long Baebol, i gud we yu folem long Baebol blong yu. Yu mas lesin gud taem hem wetem man blong haos tufala i storian, from we maet yu save givhan long hem, blong ansa long sam tok we man ya i talem blong blokem storian. (Pri. 4:12) I gud we yu tingbaot se: Yu no mas jenisim tingting ya we fren blong yu i stap tokbaot, mo lidim storian i go long wan narafala poen. Sipos yu mekem olsem, tingting blong hem i save foldaon, mo yu mekem tingting blong man blong haos tu i fassas. Samtaem, maet i stret blong yu joen long storian. Be sipos yu wantem talem wan samting, i gud we yu mekem toktok blong yu i sot nomo. Mo yu letem pablisa i gohed long storian blong hem.

¹⁹ ?Taem yutufala i stap wokbaot i go long nekis haos, yu save mekem wanem blong givhan long hem? I gud we yu yusum taem ya blong tokbaot olsem wanem yutufala i save kam gud moa. Yu mas lukaot gud se storian blong yu i no mekem pablisa ya i gat rong tingting long ol man long teritori. Mo yu mas lukaot gud se yu no tokbaot mastik blong ol narafala pablisa. (Prov. 18:24) I gud we oltaem yumi tingbaot se yumi olsem ol graonpot nomo. Nating se yumi no save mekem plante gudfala wok, be Jehova i kaen long yumi, taswe hem i givim wok ya blong talemaot gud nius long yumi. (**Ridim 2 Korin 4:1, 7.**) Ale, i gud yumi evriwan i traehad blong mekem gud wok ya blong talemaot gud nius.

^{19.} ?I gud we oltaem yumi tingbaot wanem, mo from wanem?



?YU YU “STRONG BLONG MEKEM OL GUDFALA SAMTING”?

*‘Jisas Kraes, hem i givim
laef blong hem blong me-
kem we laef blong yumi
i klin, yumi man blong
hem nomo, mo yumi
strong blong mekem
ol gudfala samting.’*

—TAET. 2:14.

?BAMBAE YU YU ANSA OLSEM WANEM?

?From wanem yumi glad tumas
taem yumi strong blong mekem
ol gudfala wok?

?Olsem wanem Daniel 2:41-45
i soemaot se yumi mas wok
strong long wok blong prij?

Yu eksplenem olsem wanem
ol gudfala fasin oli pulum man
blong wosipim Jehova.

PLANTE man oli ting se taem oli kasem praes from ol gudfala wok blong olgeta, ol man bambae oli leftemap olgeta. Sam man oli kasem sam praes evri yia, from we oli bin wok strong blong putum pis bitwin tu grup blong man we oli stap raorao. Be God i sanem ol man blong hem blong oli wok olsem ol ambasada mo ol mesenja, blong givhan long ol man blong oli gat pis wetem hem. !Hemia wan samting we i soemaot se God i tinghae long olgeta!

² Jehova i tinghae tu long yumi ol Witnes blong hem. Hem wetem Jisas tufala i wantem se yumi go talem long ol man blong oli ‘kam fren blong God.’ (2 Kor. 5:20) Yes, Jehova i yusum yumi blong mekem wok ya blong go pulum ol man oli kam long hem. Long bitim 235 kantri, plante milian man oli glad blong fren gud wetem God, mo oli gat hop ya blong kasem laef we i no save finis. (Taet. 2:11) Yumi gat strong tingting blong singaot eniman we ‘i wantem dring, blong i kam tekem wota ya blong laef, we i olsem presen blong hem.’ (Rev. 22:17) Taem yumi mekem gud wok ya we Jehova i givim long yumi, ol man oli luk yumi se “yumi strong blong mekem ol gudfala samting.” (Taet. 2:14) Naoia bambae yumi tokbaot olsem wanem strong tingting we yumi gat blong mekem ol gudfala samting, i save givhan long yumi blong pulum ol man oli kam long Jehova. Faswan samting hemia taem yumi go talemaot gudnius long ol man.

YUMI MEKEM TINGTING BLONG YUMI I STRONG OLSEM JEHOVA MO JISAS

³ Aesea 9:7 i tokbaot samting we Jisas bambae i mekem taem hem i rul. Hem i talem se Jehova i ‘mekem tingting blong hem i strong blong mekem olgeta samting ya i kamtru.’ Tok ya i tijim yumi se Papa blong yumi long heven i wantem tumas blong sevem ol man. From samting ya, yumi mas mekem tingting blong yumi i strong blong sapotem wok blong ta-

1, 2. ?Wanem wok we ol Witnes blong Jehova oli mekem? ?Mo yu yu harem olsem wanem long wok ya?

3. ?Tok ya se Jehova i ‘mekem tingting blong hem i strong,’ i tijim yumi long wanem?

lemaot Kingdom, mo yumi mas glad blong mekem wok ya. Taem yumi wantem tumas blong givhan long ol man blong oli save Jehova, yumi stap soemaot sem tingting olsem hem. Yumi joen wetem God blong mekem wok blong hem. Taswe, yumi mas gat strong tingting blong talemaot gud nius long ol man, nomata wanem samting i hapen long laef blong yumi.—1 Kor. 3:9.

⁴ Jisas tu i mekem tingting blong hem i strong. Hem i soemaot wan nambawan eksampol long fasin ya blong wok strong long wok blong prij. Nating se ol man oli mekem i nogud long hem, mo oli mekem hem i harem nogud long bodi blong hem, be hem i stanap strong gogo kasem we hem i ded. (Jon 18:36, 37) Tingting blong Jisas i kam strong moa, taem hem i kam klosap long stret taem blong givim laef blong hem olsem wan sakrefaes.

⁵ Klosap long en blong yia 32, Jisas i tokbaot wan man we i gat wan figtri long garen blong hem. Be tri yia finis, figtri ya i no karem frut. Ale, hem i talem long man we i stap lukaot long garen blong hem blong i go katemaot figtri ya. Be man ya i talem se i gud blong livim figtri ya stap fastaem, blong hem i save digim graon long stamba blong hem, mo i putum sitsit blong buluk i goraon long hem blong mekem i grugud. (*Ridim Luk 13:6-9.*) Taem Jisas i talem parabol ya, hem i stap prij tri yia finis long ol man Jiu. Be smol man nomo oli lesin long hem, nao oli kam disaepol blong hem. Biaen, from we Jisas i gat smol taem nomo i stap bifo we hem i ded, hem i wok had moa blong givhan long ol man long Judia mo Perea. Sam dei bifo we Jisas i ded, ol man long ples blong hem oli soemaot se “oli blokem sora blong olgeta,” nao Jisas i krae from olgeta.—Mat. 13:15; Luk 19:41.

⁶ From we yumi stap kam klosap moa long taem blong en, i impoten we yumi wok strong moa long wok blong prij. (*Ridim Daniel 2:41-45.*) !Yumi glad

4. ?Jisas i soemaot olsem wanem se hem i wok strong long wok blong prij?

5. ?Wanem samting long parabol ya blong figtri we i laenap wetem wok blong Jisas?

6. ?From wanem yumi mas wok strong moa long wok blong prij?

tumas blong stap olsem Witnes blong Jehova! Ol Witnes blong Jehova nomo oli stap givhan long ol man blong oli kasem save long rod ya we God i stap yusum, blong stretem ol trabol blong man. Wan woman we i stap raetem niuspepa, i tokbaot wan kwestin we plante man oli **no save ansa** blong hem. Hemia kwestin ya se: “?From wanem ol gudfala man oli stap kasem trabol?” Yumi gat nambawan janis ya blong soemaot ansa we Baebol i givim long kwestin ya. Hemia nao wok we God i givim long yumi. Yumi mas glad se ‘tabu spirit bambae i fulap long yumi,’ nao yumi save mekem wok ya we yumi glad. (Rom 12:11, NW) Yes, God nomo i givhan long yumi, nao yumi save mekem wok ya blong halpem ol man blong oli save hem mo oli lavem hem.

YUMI ONA LONG JEHOVA TAEM YUMI LEGO SAMTING WE YUMI WANTEM

⁷ Aposol Pol i talem se taem hem i stap prij, hem i “no gat taem blong slip mo kakae.” Maet samting ya i hapen long yumi tu, taem yumi stap mekem wok ya blong talemaot gud nius. (2 Kor. 6:5) Toktok ya blong Pol i soemaot se hem i lego samting we hem nomo i wantem, blong i save talemaot gud nius. Yumi save tingbaot ol paenia we oli wok strong long wok blong prij, mo long semtaem, oli wok smol blong winim mane blong givhan long olgeta. Ol misinari tu oli lego plante samting, blong oli save go prij long ol defdefren kantri. Ol wok we oli mekem i olsem wan sakrefaes we oli ‘givim long God blong mekem wosip long hem.’ (Fil. 2:17) ?Olsem wanem long ol elda? Samtaem olgeta tu oli no kakae mo oli no slip gud from we oli mas givhan long ol sipsip blong Jehova. I gat ol olfala tu mo olgeta we oli sik, we oli stap traehad blong go long olgeta miting mo long wok blong prij. Taem yumi tingbaot ol man ya blong Jehova we oli lego samting we olgeta nomo oli wantem, hemia i mekem yumi glad tumas. Mo fasin olsem, i pulum ol narafala tu blong oli gat gudfala tingting long wok we yumi mekem.

7, 8. ?Taem yumi lego samting we yumi nomo i wantem, hemia i pulum ol narafala blong mekem wanem?



Ol man oli stap lukluk yumi taem yumi wok strong long wok blong prij, mo hemia i save pulum olgeta oli kam long trutok

⁸ Wan man we i no Witnes blong Jehova, i talem tingting blong hem long wan leta we hem i raetem i go long *Boston Target*, wan niuspepa long Yunated Kingdom. Man ya i talem se: ‘Plante man tede oli no moa go long jos. ?Taswe ol lida blong jos oli stap mekem wanem evri dei? Olgeta oli no go lukaotem ol man olsem we Kraes i mekem. Wan skul nomo we i mekem olsem, hemia ol Witnes blong Jehova. Ol Witnes oli go lukaotem ol man mo tijim olgeta long trutok.’ Tede, ol man oli mekem samting we olgeta nomo oli save harem gud long hem. Be taem yumi lego samting we yumi wantem, blong yumi save mekem wok blong God, hemia i leftemap nem blong Jehova.—Rom 12:1.

⁹ ?Yumi save mekem wanem, sipos tingting blong yumi i no moa strong blong prij? Yumi mas tingbaot se, ?Jehova i yusum wok blong prij blong mekem wanem? (*Ridim Rom 10:13-15.*) Jehova bambae i sevem ol man we oli singaot long nem blong hem. Be sipos yumi no prij long ol man, bambae oli no save singaot long nem ya. Sipos

9. ?Wanem i pulum yumi blong yumi wok strong long wok blong prij?

yumi luksave samting ya, hemia bambae i pulum yumi blong yumi wok strong blong talemaot gud nius blong Kingdom.

OL GUDFALA FASIN BLONG YUMI OLI PULUM MAN I KAM LONG GOD

¹⁰ Be strong tingting nomo i no naf. Wan narafala samting we i save pulum man i kam long God, hemia ol gudfala fasin blong yumi. Pol i tokbaot from wanem i impoten we yumi gat ol gudfala fasin. Hem i talem se: “Mifala i no wantem we sam man oli save faenem sam rabis poen long ol wok blong mifala. Nao mifala i stap traehad, blong mifala i no mekem sam fasin we narafala man bambae i save foldaon long hem.” (2 Kor. 6:3) Ol gudfala toktok blong yumi mo ol gudfala fasin blong yumi, oli leftemap tok blong God, mo oli pulum ol man blong oli save Jehova. (Taet. 2:10) I gat plante stori we oli soemaot se taem ol man blong God oli mekem ol gudfala fasin, oltaem i gat gudfala samting i kamaot.

10. ?Pol i talem wanem blong soemaot se i impoten we yumi gat ol gudfala fasin?

¹¹ Yumi luksave se fasin blong yumi i save pulum man i kam long Jehova. Be oli save pulum man blong i tingting nogud long yumi tu. Taswe, taem yumi stap long wok, long haos, mo long skul, yumi mas lukaot gud se fasin blong yumi i no pulum man blong i faenem sam rabis poen long wok we yumi mekem. Sipos yumi stap gohed blong mekem sin, bambae yumi kasem bigfala trabol. (Hib. 10:26, 27) Ol tingting ya oli mas pulum yumi blong lukluk gud long ol samting we yumi stap mekem, mo blong tingbaot se ol fasin blong yumi oli givim wanem tingting long ol narafala. Mo i gud yumi tokbaot samting ya long prea blong yumi. Tede, ol gudfala fasin oli stap lus. Nating se i olsem, ol man we oli waes bambae oli luksave 'man we i stap mekem wok blong God' mo 'man we i no stap mekem wok blong God.' (Mal. 3:18) Yes, ol gudfala fasin blong yumi oli save pulum ol man blong oli fren gud wetem God.

¹² Taem Pol i raetem leta i go long ol Kristin long Korin, hem i talem se hem i harem nogud plante taem, from we hem i kasem hadtaem, ol man oli agensem hem, oli kilim hem, mo oli putum hem long kalabus. (*Ridim 2 Korin 6:4, 5.*) Taem yumi kasem ol trabol mo yumi mekem tingting blong yumi i longfala, samting ya i save givhan long ol man blong oli kam long trutok. Sam yia i pas, ol man oli wantem kilim i ded olgeta Witnes blong Jehova long Angola. Oli holem wan Witnes wetem woman blong hem, mo 30 man mo woman we oli stap stadi. Ale, oli kilim olgeta gogo, blad i kamaot long bodi blong olgeta. Oli kilim nogud ol woman mo ol pikinini tu. Oli mekem olsem, from we oli wantem mekem ol man oli fraet, nao bambae oli no lesin long ol Witnes blong Jehova. Plante man oli kam hivap raon long olgeta, blong lukluk. Be afta long trabol ya, plante man long eria ya, oli kam askem Baebol stadi long ol Witnes. Biaen, ol Witnes oli gohed blong talemaot Kingdom mo gudfala samting we i kamaot, se plante man oli kam long trutok.

11. ?From wanem yumi mas lukaot gud long ol fasin blong yumi mo ol samting we yumi mekem?

12-14. ?Taem yumi stanap strong long ol trabol we oli traem bilif blong yumi, hemia i mekem wanem long ol man? Yu talem wan eksapol.

¹³ Stori ya i soemaot se sipos yumi holemstrong long ol rul blong Baebol, samting ya i save givhan long ol narafala. Taem Pita mo ol narafala aposol oli stanap strong, oli pulum plante man blong oli kam fren blong Jehova. (Wok 5:17-29) Yumi tu, yumi save mekem sem mak. Sipos yumi soemaot gudfala fasin long ol fren long skul, long wok, mo long ol famle blong yumi, olgeta tu oli save kam fren blong Jehova.

¹⁴ Long plante ples tede, ol brata blong yumi oli kasem trabol. Long Amenia, klosap 40 brata oli stap long kalabus from we oli no joen long faet, mo i luk olsem se long ol manis we i kam, bambae i gat sam moa brata oli go kalabus. Long Eritrea, 55 man blong Jehova oli stap long kalabus, we sam long olgeta ya, oli gat bitim 60 yia. Long Saot Kororia, klosap 700 Witnes oli go kalabus from bilif blong olgeta. Fasin ya i stap gohed olsem klosap 60 yia finis. I gud yumi prea se ol gudfala brata ya blong yumi, bambae oli gohed blong soemaot ol gudfala fasin we oli leftemap nem blong Jehova, mo oli pulum ol man we oli laekem stret fasin oli kam long trutok.—Sam 76:8-10.

¹⁵ Taem yumi no giaman, hemia tu i save pulum man i kam long trutok. (*Ridim 2 Korin 6:4, 7.*) Yu traem tingbaot stori ya. Wan Kristin sista i wantem pem bas blong i karem hem i go long wan ples we i no longwe. Ale, wan woman i talem long hem se, hem i no nid blong pem from we ples ya i klosap nomo. Be sista ya i talem se i oraet nomo, bambae hem i pem bas ya. Afta we woman ya i kamaot long bas, draeva blong bas i askem long sista ya se: “?Yu yu wan Witnes blong Jehova?” Sista ya i ansa se: “Yes. ?Yu askem olsem from?” Draeva i se: “Mi harem yu stap toktok long narafala woman ya long saed blong mane blong bas, mo mi mi save se ol Witnes blong Jehova oli ol man we oli talem samting we i tru.” Sam manis biaen, sista ya i go long miting, nao wan man i kam luk hem mo i askem long hem se: “?Yu luksave mi? Mi mi draeva ya we mi toktok long yu long saed blong mane blong bas. Taem mi luk gudfala fasin blong yu, mi tekem desisen blong stadi Baebol wetem ol Witnes blong

15. Yu tokbaot wan stori we i soemaot se taem yumi tok tru, hemia i save pulum narafala i kam long trutok.



Taem yumi tok tru mo yumi wok strong, ol man oli luksave samting ya

tingting ya se man i mas “pem” olgeta from ol wok we oli mekem. (Mat. 10:8) Oli olsem ol pris long Isrel bifo, we oli “talemaot mining blong ol loa blong God, long ol man nomo we oli save pem olgeta from.” Mo plante samting we oli tijim i no kamaot long Baebol. (Maeka 3:11) Be fasin olsem i no pulum man blong i kam fren blong God.

¹⁷ Defren olgeta, ol samting we ol tru Kristin oli tijim mo ol gudfala wok we oli mekem, i pulum plante man oli kam long trutok. Wan brata we i paenia i stap prij long ol haos wanwan. Ale, wan olfala woman i blokem tok blong hem kwiktaem nomo, taem i luksave se hem i wan Witness. Olfala woman ya i talem se taem brata ya i noknok long doa, hem i stap stanap long wan lada long kijin, mo i stap traem blong jenisim wan laet we i bon. Nao brata ya i talem long hem se: “!Lukaot bae yu foldaon! !Lego i stap bae mi mekem!” Olfala woman ya i singaot hem i kam insaed. Brata ya i jenisim laet ya mo biaen hem i gobak. Smoltaem biaen, boe blong olfala woman ya i kambak, nao woman ya i tokbaot samting we i hapen. Boe ya i sapraes tumas, ale hem i lukaotem brata ya blong talem tangkiu long hem. Biaen tufala i storian gud, mo boe ya i agri blong stadi Baebol.

¹⁸ ?From wanem yumi mas mekem ol gudfala samting? Hemia from we taem yumi mekem tingting blong yumi i strong blong prij, mo yumi mekem samting we Jehova i wantem, yumi stap leftemap nem blong Jehova mo yumi stap givhan long ol man, blong Jehova i sevem olgeta. (*Ridim 1 Korin 10:31-33.*) Taem yumi gat strong tingting blong talemaot gud nius, mo yumi mekem ol gudfala fasin, yumi soemaot se yumi lavem God mo ol man. (Mat. 22:37-39) Sipos yumi strong blong mekem ol gudfala samting, bambae Jehova i blessem yumi bigwan mo bambae yumi glad. Mo tu, yumi save harem gud blong wet long taem ya, we olgeta man bambae oli strong blong mekem wosip long Jehova, mo blong leftemap nem blong hem.

Jehova.” Taem yumi tok tru, ol man oli save trastem yumi.

YUMI MAS GOHED BLONG MEKEM OL FASIN WE OLI LEFTEMAP JEHOVA

¹⁶ Yumi save givhan long ol man tu blong oli kam klosap long Jehova, taem yumi soemaot ol gudfala fasin olsem, longfala tingting, lav mo kaen fasin. Maet sam man we oli stap lukluk yumi, oli wantem save Jehova mo stamba tingting blong hem, mo oli wantem save ol man blong hem tu. Fasin blong ol tru Kristin i defren olgeta long fasin blong ol man blong wol, we oli stap talem se oli wosipim God be oli giaman nomo. Sam lida blong skul oli kam rij from ol kleksen we ol man oli stap givim i go long jos. Oli stap trikim ol man blong olgeta blong stilim mane blong olgeta, mo oli yusum ol mane ya blong wokem ol bigfala haos we oli flas, mo blong pem ol trak we oli sas. Wan lida blong skul i pem haos blong dog blong hem we insaed long hem, i gat masin blong mekem rum i kolkol, we oli kolek ekondisen. Yes, plante man we oli talem se oli folem Kraes, oli gat

16. ?From wanem longfala tingting, lav, kaen fasin i pulum ol man oli kam long Jehova? Yu talem wan eksampol blong samting we ol lida blong skul oli mekem.

17, 18. (1) ?Taem yumi soemaot ol gudfala fasin, hemia i leftemap nem blong Jehova olsem wanem? (2) ?Wanem i pulum yu blong mekem ol gudfala samting?

?I tru se ol man Isrel oli hangem man nogud long wud, blong kilim hem i ded?

■ Long plante neson bifo, oli hangem ol man nogud long wan wud no wan pos, blong kilim hem i ded. Ol man Rom oli fasem man nogud mo oli nilim hem long pos. Afta, bambae hem i hang blong sam dei kasem we hem i ded, from we hem i harem i soa tumas, san i bonem hem, ren i wasem hem, hem i hanggri mo i tosta. Hemia wan panis we ol man Rom oli yusum blong mekem man ya i sem.

?Olsem wanem long ol man Isrel bifo? ?Oli hangem ol man nogud long wud, blong kilim olgeta oli ded? Loa we God i givim long Moses i talem se: "Sipos wan man i mekem wan samting we i stret blong hem i ded from, nao yufala i kilim hem i ded, mo yufala i tekem bodi blong hem, yufala i hangem long wan wud, fasin ya i soemaot we Hae God nao i panisim man ya. Be bodi blong hem bambae i no mas hang long wud ya go kasem nekis dei. Yufala i mas berem hem long sem dei ya nomo." (Dut. 21:22, 23) I klia se, long taem we oli raetem Baebol fastaem long lanwis Hibiru, wan man we i mekem wan samting we i stret blong hem i ded from, oli kilim hem i ded fastaem, mo biae oli hangem hem long wan wud no wan tri.

Levitikas 20:2 i tokbaot fasin ya i se: "Sipos wan long yufala no wan narafala man we i stap wetem yufala i kilim wan pikini ni blong hem blong mekem sakrefaes long god ya Molek, bambae yufala i mas stonem hem i ded." Oli kilim i ded olgeta tu we oli stap toktok wetem ol devel blong ol dedman mo ol narafala devel. ?Oli kilim olgeta olsem wanem? Hemia taem oli 'stonem olgeta i ded.'—Lev. 20:27.

Dutronome 22:23, 24 i talem se: "Mo sipos yufala i luk we wan man i slip wetem

wan gel we oli blokem finis se i blong narafala man, mo tufala i mekem insaed long ples blong yufala, bambae yufala i mas tekem tufala i go afsaed long ples blong yufala, nao yufala i mas stonem tufala gogo tufala i ded, blong tekemaot rabis fasin ya i gowe long ples blong yufala. Gel ya i mas ded, from we taem man ya i holem hem, hem i stap long medel blong ples blong yufala, we sipos hem i singaot, man i save

I klia se, long taem we oli raetem Baebol fastaem long lanwis Hibiru, wan man we i mekem wan samting we i stret blong hem i ded from, oli kilim hem i ded fastaem, mo biae oli hangem hem long wan wud no wan tri

harem blong givhan long hem, be hem i no singaot. Mo man ya i mas ded from we hem i slip wetem wan gel we oli blokem finis, se i blong narafala man." Wan rod we ol man Isrel bifo oli stap folem blong kilim wan rabis man i ded, hemia blong stonem hem.*

Dutronome 21:23 i talem se taem oli hangem wan man long wan wud, "fasin ya i soemaot we Hae God nao i panisim man ya." Ale, taem ol man Isrel oli luk dedbodi ya, hemia i save gat bigfala paoa long olgeta mo i olsem wan woning long olgeta tu.

* Plante man blong stadi oli agri se folem Loa we God i givim long ol man Isrel, taem wan man i brekem loa, oli kilim hem i ded, **bifo** we oli hangem bodi blong hem long wan wud. Be, i gat sam samting i pruvum se long fas handred yia, ol man Jiu oli hangem sam man blong brekem loa we oli laef yet, mo oli hang gogo oli ded.



FASIN BLONG TOKTOK GUD TUGETA I MEKEM MARED I STAP STRONG

“Sipos man i save givim gudfala tok long stret taem blong hem, bambae hem i save harem gud.”

—PROV. 15:23.

?BAMBAE YU YU ANSA OLSEM WANEM?

?From wanem fasin blong kasem save long narafala, i givhan long man mo woman blong tufala i toktok gud tugeta?

?From wanem man mo woman, tufala i mas respektem tufala?

Sipos man mo woman, tufala i gat tingting daon, ?samting ya bambae i mekem wanem long mared blong tufala?

WAN brata long Kanada i talem se: “Mi mi laekem moa blong spenem taem wetem woman blong mi, i bitim we mi spenem taem wetem ol narafala man. Taem mi glad long wan samting, mi serem wetem woman blong mi, hemia i mekem se mi glad moa. Mo taem mi serem ol trabol blong mi wetem hem, ol wari blong mi oli godaon.” Wan brata long Ostrelia i talem se: “Long ol 11 yia we mitufala i mared, mi neva letem wan dei i pas we mi no toktok long woman blong mi. Mitufala i no wari se wan samting bambae i kam spolem mared blong mitufala. Bigfala risen from wanem mitufala i harem olsem, hemia se oltaem mitufala i toktok gud tugeta.” Wan sista long Kosta Rika i talem se: “Fasin blong toktok gud tugeta i mekem mared blong mitufala i kam gud moa, be i no hemia nomo, hem i mekem se mitufala i kam klosap moa long Jehova. Mo tu, fasin ya i givhan long mitufala blong winim ol samting we oli traem mitufala, mo hem i mekem se mitufala i joen gud tugeta, mo mitufala i lavlavem mitufala.”

² ?Olsem wanem? ?Yu mo man no woman blong yu, yutufala i harem gud blong toktok tugeta, no yutufala i luk se i had tumas? Blong talem stret, taem man mo woman i mared, bambae tufala i fesem sam trabol from we tufala i sinman, tufala i grup long defdefren ples, mo tufala i gat defdefren fasin. (Rom 3:23) Antap moa, maet tufala i gat ol defdefren fasin blong toktok. Taswe, John M. Gottman mo Nan Silver, tufala i talem se: “Mared i wan samting we i had tumas. Man mo woman i mas gat strong tingting mo wan tingting we i no save jenis, olsem nao bambae mared i save stap longtaem.”

³ Wan gudfala mared i no kamaot olsem nomo. Man mo woman, tufala i mas traehad blong mekem se mared blong tufala i stap gud, mo tufala i glad long hem. Man mo woman we tufala i

-
1. ?Fasin blong toktok gud tugeta i givhan long mared olsem wanem?
 2. ?Wanem sam samting we i mekem se i had blong man mo woman i toktok gud tugeta?
 3. ?Wanem i givhan long man mo woman blong mekem mared blong tufala i stap strong?

lavlavem tufala, tufala i save harem gud long mared blong tufala. (Pri. 9:9) Yu traem tingbaot Aesak mo Rebeka. (Jen. 24:67) Tufala i mared longtaem, be mared blong tufala i stap strong. I no gat wan vas blong Baebol we i soemaot se tufala i no moa lavlavem tufala. Plante mared tede tu i olsem. ?Wanem i mekem se ol mared ya oli stap strong olsem? Man mo woman, tufala i wokem fasin ya blong kasem save long tufala, tufala i soemaot lav, respek, mo tingting daon. Ol fasin ya oli givhan long tufala blong tufala i talemaot ol tingting mo ol filing blong tufala, long fasin we i kaen mo i tru. Naoia bambae yumi luk se taem man mo woman tufala i soemaot ol fasin ya insaed long mared, hemia i save mekem se tufala i toktok gud tugeta.

YUTUFALA I MAS TRAEM KASEM SAVE LONG YUTUFALA

⁴ Ol Proverb 16:20 (NW) i talem se: "Man we i traem kasem save long wan bisnis, bambae i faenem gudfala samting." Hemia i tru long saed blong mared mo laef insaed long famle. (**Ridim Ol Proverb 24:3.**) Baebol nomo i givhan long yumi blong kasem save samting, mo i mekem yumi waes. Jenesis 2:18 i talem se, God i mekem woman blong i kam fren blong man blong hem, be tufala i no sem mak. Woman i soemaot samting ya, long fasin blong hem blong toktok wetem man blong hem. Yumi evriwan i gat ol defdefren fasin. Ol woman oli laekem blong tokbaot ol man, ol fren blong olgeta, mo oli laekem blong talemaot ol filing blong olgeta. Oli laekem taem man i lesin mo i soemaot se hem i kea long olgeta. Be ol man oli no olsem. Oli no talemaot tumas ol filing blong olgeta, be oli laekem moa blong tokbaot ol samting we oli mekem, ol trabol blong olgeta, mo samting we oli mekem blong winim ol trabol ya. Mo oli wantem se narafala i respektem olgeta.

⁵ Wan sista long Ingran i talem se: "Man blong mi i wantem stretem trabol kwiktaem nomo. Hem i no wantem harem tingting blong mi fastaem. Hemia i mekem se i had, from we mi mi wantem we hem i lesin long mi." Wan man i talem se: "Taem mi mo woman blong mi, mitufala i jes mared, mi mi kwik blong faenem rod blong stretem trabol, taem mi luk

4, 5. ?Fasin ya blong kasem save long narafala, i givhan long man mo woman olsem wanem? Yu talem sam eksampol.

se woman blong mi i harem nogud. Be biae, mi luksave se woman blong mi i nidim nomo blong mi lesin long hem." (Prov. 18:13; Jem. 1:19) Wan man we i kasem save long narafala, hem i luksave ol filing blong woman blong hem, mo hem i traem blong jenesim toktok blong hem, blong mekem i gud long woman blong hem. Mo long semtaem, hem i mekem woman blong hem i luksave se hem i tingbaot ol tingting mo ol filing blong hem. (1 Pita 3:7) Mo woman tu i mas kasem save long tingting blong man blong hem. Man mo woman tufala i mas kasem save long tufala, tufala i mas glad long wok blong tufala, mo tufala i mas mekem gud wok we Baebol i talem long tufala blong mekem. Sipos tufala i mekem ol samting ya, bambae tufala i glad long mared blong tufala. Mo bambae tufala i naf blong wok tugeta blong mekem ol desisen we oli waes.

⁶ Mo tu, man mo woman we tufala i kasem save long tufala, tufala i luksave se 'i gat taem blong stap kwaet, mo i gat taem blong toktok.' (Pri. 3:1, 7) Wan sista we i mared 10 yia finis i talem se: "Naoia mi luksave se i gat sam taem we i no stret blong mi talem wan samting. Taem mi luk se man blong mi i bisi blong mekem wan wok, no hem i gat plante wok blong mekem, mi letem sam dei i pas bifo we mi tokbaot wan samting wetem hem. Taem mi mekem olsem, mi luk se mitufala i storian gud." Ol woman we oli luksave samting, oli toktok kaen. Oli luksave se taem oli talem gudfala tok "**long stret taem blong hem,**" hemia i save mekem narafala i harem gud mo i glad.—**Ridim Ol Proverb 15:23.**

⁷ Wan Kristin man i mas lesin long samting we woman blong hem i talem. Be hem i mas talemaot klia ol tingting blong hem tu. Wan elda we i mared 27 yia finis i talem se: "Mi mi traehad blong talemaot long woman blong mi, samting we i stap long hat blong mi." Wan brata we i mared 24 yia finis i talem se: "Taem i gat wan problem, mi mi no wantem talemaot tingting blong mi, from we mi ting se samting ya i save mekem problem ya i lus. Be biae mi luksave se i no rong sipos mi talemaot tingting blong mi. Taem mi harem se i had blong talemaot tingting blong mi, mi prea long God, blong i givhan long mi

6, 7. (1) ?Ol tok blong Prija 3:7 oli givhan long man mo woman blong tufala i luksave wanem? (2) ?Woman we i luksave samting, hem i mekem wanem? ?Mo wanem samting we wan man i mas mekem?



Ol smosmol samting
oli save mekem wan bigfala
jenis long mared blong tufala

blong mi faenem ol stret tok we mi mas talem, mo blong mi toktok kaen. Biaen mi pulum gud win, nao mi stat blong talemaot tingting blong mi.” Samfala man mo woman oli luk se, stret taem blong oli save talemaot tingting blong olgeta, hemia taem oli ridim Baebol no vas blong dei tugeta.

⁸ I impoten we Kristin man mo woman tufala i prea, mo tufala i traehad blong kamgud moa long fasin blong toktok gud tugeta. I tru se i had blong jenisim fasin blong tufala. Be sipos tufala i lavem Jehova, tufala i askem tabu spirit blong hem, mo tufala i tinghae long mared, bambae tufala i glad long mared blong tufala. Hemia wan samting we plante mared man tede oli no mekem. Wan woman we i gat 26 yia i talem se: “Mi wetem man blong mi, mitufala i traehad blong gat tingting blong Jehova. Taswe, mitufala i no gat tingting ya blong seraot. Samting ya i mekem se mitufala i toktok gud tugeta, mo mitufala i wok had blong traem faenem rod blong winim ol problem long mared blong mitufala.” Taem man mo woman i stap tru long tufala mo tufala i folem ol tingting blong God, mared blong tufala i stap gud from we God i blesem tufala.—Sam 127:1.

YUTUFALA I MAS LAVLAVEM YUTUFALA

⁹ Lav i “save joenemgud olgeta samting, blong oli

8. ?Wanem samting we man mo woman tufala i mas mekem blong mared blong tufala i stap gud?

9, 10. ?Wanem sam samting we man mo woman tufala i save mekem blong tufala i lavlavem tufala moa?

kam wan.” Long wan mared, i impoten tumas blong gat fasin ya. (Kol. 3:14) Taem wan man mo woman i mared, tufala i mekem plante samting tugeta, nating se long gudtaem mo long hadtaem. Ale, from we tufala i spenem plante taem tugeta, lav we tufala i gat long tufala i stap kam bigwan moa oltaem. Tufala i fren gud moa, mo tufala i harem gud blong stap tugeta. I gat sam samting tu we i givhan long mared blong tufala blong i stap strong oltaem. Ol samting ya oli no ol bigfala samting we ol man long televisin no long muvi, oli talem. Be oli ol smosmol samting nomo olsem, tufala i putum han i goraon long tufala, tufala i talem sam swit tok long tufala, smael mo sam narafala samting olsem. Mo tu, maet tufala i talem wan tok olsem: ‘?Olsem wanem long dei blong yu?’ Ol **smosmol** samting olsem oli save mekem wan **bigfala** jenis long mared blong tufala. Wan man we i mared 19 yia finis, mo i glad long mared blong hem, i talem se: “Plante taem long dei, mi mo woman blong mi, mitufala i stap ring no sanem teks mesej long mitufala, blong faenemaot sipos evri samting i oraet.”

¹⁰ Lav i pulum man mo woman blong tufala i gohed blong save gud tufala. (Fil. 2:4) Taem tufala i save gud tufala, tufala i lavlavem tufala moa, nating se tufala i sinman. Wan mared i kam strong moa mo i kam gud moa, taem ol yia oli stap pas. Taswe, sipos yu yu mared finis, i gud yu askem se: ‘?Mi mi save gud man no woman blong mi? ?Mi mi kasem save long tingting mo filing blong hem? ?Mi mi stap ting-

baot yet ol fasin blong hem, we oli pulum mi blong mi laekem hem?'

YUTUFALA I MAS RESPEKTEM YUTUFALA

¹¹ Wan mared we i hapi, i no min se evri samting we tufala i mekem long mared blong tufala, bambae i stret gud olgeta. Mo tu, i no min se man mo woman we tufala i lavlavem tufala, bambae tufala i gat sem tingting long evri samting. Ebrahim mo Sera tu, samtaem tufala i no agri long sam samting. (Jen. 21: 9-11) Nating se i olsem, tufala i no letem samting ya i mekem se tufala i no moa fren gud. Tufala i kaen long tufala mo tufala i respektem tufala. Samtaem Ebrahim i talem long Sera se "i gud yu talem." (Jen. 12:11, 13) Sera tu i obei long Ebrahim, mo hem i ting-baot Ebrahim olsem "masta" blong hem. (1 Pita 3:6) Taem man mo woman tufala i no moa gat respek long tufala, ol man oli harem save long toktok blong tufala mo long voes blong tufala. (Prov. 12:18) Sipos tufala i no stretem trabol ya, mared blong tufala i save brok.—*Ridim Jemes 3:7-10, 17, 18.*

¹² Man mo woman we tufala i jes mared, tufala i mas traehad blong toktok kaen, mo tufala i mas respektem tufala. Olsem nao, bambae tufala i no

11. ?From wanem i impoten tumas blong gat respek insaed long mared? Yu talem wan eksampol.

12. ?From wanem man mo woman we i jes mared, tufala i mas traehad blong toktok long tufala wetem respek?

fraet blong talemaot tingting blong tufala, mo oltaem bambae tufala stap tok tru long tufala. Wan man i talem se: "I tru se long ol fas yia blong mared, bambae yu glad, be samtaem yu save harem nogud mo yu kam kros tu. Taem yu stat blong save gud filing blong woman blong yu, ol fasin blong hem, mo ol samting we hem i laekem, mo hem tu i save gud yu, tingting blong yu bambae i olbaot nomo. Be sipos yutufala i traehad blong gat longfala tingting, yutufala i toktok kwaet, toktok kaen, mo yutufala i dipen oltaem long Jehova, hemia bambae i givhan bigwan long yutufala long ol yia we oli kam biaen." !Hemia i gud tumas!

YUTUFALA I MAS GAT TINGTING DAON

¹³ Fasin blong toktok gud tugeta i olsem wan reva we i ron kwaet nomo, i pastru long wan garen. Wan gudfala fasin bakegen we i givhan long man blong i toktok gud, hemia taem man i mekem 'tingting blong hem i stap daon.' (1 Pita 3:8) Wan brata we i mared 11 yia finis i talem se: "Tingting daon, hem i wan gudfala fasin we i givhan long man blong strettem trabol kwiktaem, from we hem i pulum man blong i talem se, 'Mi mi sore.'" Wan elda we i mared 20 yia finis i talem se: "Plante taem, tok ya 'Mi mi sore,' i moa impoten i bitim tok ya 'Mi mi lavem

13. ?From wanem i impoten blong gat tingting daon insaed long mared?

Yutufala i mas gohed blong toktok gud tugeta



yu." Hem i gohed i se: "Wan samting we i save givhan long man blong i gat tingting daon hemia prea. Taem mi mo woman blong mi mitufala i prea tugeta, hemia i givhan long mitufala blong tingbaot se mitufala i sinman. Mo hemia i givhan long mitufala tu blong tingbaot ol samting we Jehova i mekem long gladhat blong hem. Taem mi tingbaot ol gudfala samting olsem, hemia i givhan long mi blong mi gat stret tingting long evri samting."

¹⁴ Be man we i flas, oltaem hem i wantem win taem i gat wan trabol. Fasin ya i blokem man blong i no moa toktok, mo i blokem man tu blong i talem sore. Man olsem hem i no save talem se: "Mi sore, plis yu fogivim mi." Be hem i mekem eskus from evri samting. Oltaem hem i talem se i fol blong narafala, i bitim we hem luksave ol mastik blong hem. Taem narafala i mekem hem i harem nogud, hem i no traem blong mekem pis. Be hem i kam kros, i talem ol strong tok, no maet i stap kwaet, i no moa wantem toktok. (Pri. 7:9) Flas tingting i olsem wan posen we i save kilim mared i ded. Yes hem i save spolem wan mared. Taswe, i gud blong tingbaot ol tok ya se: "God i agensem olgeta we oli praod, be long olgeta we tingting blong olgeta i stap daon, hem i stap givhan long olgeta long gladhat blong hem."—Jem. 4:6.

¹⁵ Man we i ting se fasin ya bambae i neva kamaot long mared blong hem, hem i krangke nomo. Yumi mas luksave sipos yumi gat fasin ya mo yumi mas kwik blong sakemaot. Pol i talem long ol narafala Kristin se: "Yufala i no stap kros, gogo kasem san i godaon. Yufala i mas no givim janis long Setan." (Efes. 4:26, 27) Sipos man mo woman tufala i no folem ol tok blong God long Baebol, bambae tufala i harem nogud tumas. Wan sista i talem se: "Mi mo man blong mi, mitufala i no stap folem ol tok blong Efesas 4:26, 27. From samting ya, samtaem mi no slip long naet." Tru ya, i moa gud blong tokbaot ol trabol kwiktaem mo traem faenem rod blong stretem. Taem man mo woman i kros, tufala i mas letem smol taem i pas blong tingting blong tufala i godaon. Mo i gud we tufala i prea blong askem long Jehova, blong i givhan long tufala blong gat gudfala tingting. Hemia i min se tufala wanwan i mas gat tingting daon tu. Olsem nao, bambae tufala i tingbaot

moa blong stretem trabol, i bitim we tufala i tingbaot tufala nomo, nao tufala i mekem trabol i kam bigwan moa.—*Ridim Kolosi 3:12; Efesas 4:32.*

¹⁶ Taem man mo woman tufala i gat tingting daon, hemia i givhan long tufala wanwan, blong tufala i tingbaot gudfala fasin blong narawan. Maet woman i gat gudhan blong mekem wan samting we i save givhan long famle blong hem. Sipos man blong hem i gat tingting daon, bambae hem i no gat tingting ya se woman blong hem i daonem hem. Be bambae hem i leftemap tingting blong woman blong hem, blong i yusum gud save ya we God i givim long hem. Hemia i soemaot se hem i tinghae long woman blong hem, mo i lukaot gud long hem. (Prov. 31:10, 28; Efes. 5:28, 29) Long sem fasin, woman we i gat tingting daon, bambae i lukaot gud se hem i no flas from we hem i gat gudhan blong mekem samting. Mo bambae hem i no daonem man blong hem. Yes, tufala i mas tingbaot se tufala i olsem "wan bodi nomo," mo taem wan long tufala i harem nogud, narawan tu i harem nogud.—Mat. 19:4, 5.

¹⁷ Ating yu yu wantem se mared blong yu i olsem mared blong Ebrahim mo Sera, mo Aesak mo Rebeka. Yu wantem se i hapi, i stap longtaem, mo i leftemap nem blong Jehova. Ale, yu mas tingbaot God long mared blong yu. Yu mas stadi long Baebol blong yu kam waes mo yu gat fasin ya blong kasem save long narafala. Jehova i stamba blong tru lav. Mo lav ya i olsem wan "faea we i laet bigwan." Sipos yu wantem gat lav ya, yu mas gat tingting ya se yu laki blong gat wan gudfala man no woman olsem. (Sing 8:6) Yutufala i mas traehad blong gat tingting daon. Yutufala i mas respektem yutufala. Sipos yutufala i mekem ol samting ya, bambae yutufala i glad long mared blong yutufala, mo bambae yutufala i mekem Jehova tu i glad. (Prov. 27:11) Mo ating bambae yu gat sem tingting olsem wan man we i mared 27 yia finis, we i talem se: "Mi no save se laef blong mi bambae i olsem wanem, sipos woman blong mi i no stap. Mared blong mitufala i stap kam strong moa evri dei. Hemia from we mitufala i lavem Jehova mo mitufala i toktok gud tugeta oltaem."

¹⁶. ?Tingting daon i save givhan olsem wanem long man mo woman?

¹⁷. ?Man mo woman tufala i save mekem wanem blong mared blong tufala i hapi, mo i leftemap nem blong Jehova?

¹⁴. ?Man we i flas i save spolem mared olsem wanem?

¹⁵. ?Efesas 4:26, 27, i givhan olsem wanem blong stretem ol trabol we i kamaot long mared?



OL PAPA MO MAMA, MO OL PIKININI, YUFALA I MAS TOKTOK GUD

"Yufala evriwan i mas rere oltaem blong lesin, be yufala i no mas hareap blong toktok. Mo yufala i no mas hareap blong kros."—JEM. 1:19.

?BAMBAE YU YU ANSA OLSEM WANEM?

?From wanem yumi mas faenem taem blong yumi toktok gud wanples?

?Ol papa mo mama oli save folem ol tok blong Jemes 1:19 olsem wanem?

?Ol pikinini oli save folem ol tok blong Jemes 1:19 olsem wanem?

"SIPOS yu faenemaot se papa mo mama blong yu bambae tufala i ded tumora, ?bambae yu wantem talem wanem long tufala tede?" Hemia wan kwestin we ol man oli askem long plante handred pikinini long Amerika. Ansa we bighaf blong ol pikinini ya oli talem, i soemaot se oli no putum tingting blong olgeta long ol problem mo ol trabol we maet oli stap kasem long haos blong olgeta. Be oli talem se bambae oli talem long papa mo mama blong olgeta se: "Mi mi sore" mo "mi mi lavem yu tumas."—*For Parents Only*, we Shaunti Feldhahn mo Lisa Rice, tufala i raetem.

² Yes, pikinini i laekem papa mo mama blong hem, mo papa mo mama tu i lavem tumas pikinini blong tufala. Yumi luk samting long ol Kristin famle. Be nating se oli laeklaekem olgeta olsem, sam samtaem oli harem se i had blong oli toktok gud. Nating se oli save storian gud mo oli tokbaot plante samting, be i gat sam samting we oli no wantem tokbaot nating. ?From wanem i olsem? ?Wanem sam samting we i save blokem olgeta blong oli no toktok gud wanples? ?Wanem i save halpem olgeta blong oli toktok gud?

YUFALA I MAS FAENEM TAEM BLONG TOKTOK GUD

³ Blong evriwan long famle oli save toktok gud wanples, oli nidim taem. Plante famle oli faenem se oli no gat inaf taem blong toktok gud wanples. Be i no oltaem we i olsem. Moses i talem long ol papa long Isrel se oli no mas fogetem ol tok ya we hem i talem long olgeta. Hem i talem se: "Oltaem, yufala i mas tijim ol pikinini blong yufala long hem. Sipos yufala i stap long haos, no yufala i stap wokbaot, no yufala i go blong slip, no yufala i girap bakegen, be yufala i mas tokbaot ol samting ya." (Dut. 6:6, 7) Long ol famle long Isrel bifo, samtaem pikinini i stap long haos wetem mama blong hem. Samtaem, hem i go long garen no long ples blong wok blong papa blong hem. I gat plante taem we papa mo mama tufala i stap wetem pikinini blong tufala, nao oli save

1, 2. ?Ol papa mo mama, mo ol pikinini, oli stap soemaot wanem fasin long olgeta? ?Be sam samtaem i had long olgeta blong mekem wanem?

3. (1) ?Wanem samting we evriwan long famle oli nidim, blong oli save toktok gud wanples? (2) ?Wanem i mekem se ol famle long Isrel bifo, oli save spenem plante taem wanples?



Yu no mas letem wan samting i blokem yu blong no toktok gud wetem famle long yu

storian wanples. Long taem olsem, papa mo mama i naf blong luksave ol samting we pikinini blong tufala i nidim, samting we hem i wantem mo ol fasin blong hem. Mo pikinini tu bambae i save gud papa mo mama blong hem.

⁴ Be naoia, laef i no moa olsem. Long sam kantri, ol pikinini oli stat blong go long skul taem oli smol nomo. Samfala oli go long skul taem oli gat tu yia. Plante papa mo mama oli wok long ol ples we i longwe long haos. Maet oli toktok wetem pikinini nomo taem oli finis wok mo taem pikinini i kambak long skul. Plante taem, nating se oli gat smol taem, be oli no save toktok gud wanples from we oli wok long kompiuta, oli wajem televisin mo muvi. Long sam famle, evriwan oli gat wanwan laef, oli olsem ol strenja nomo. Ale, oli no save se wanem ya toktok gud.

⁵ ?Olsem wanem? ?Yu yu save yusum gud taem we yu spenem long ol narafala samting, blong spenem moa taem wetem famle blong yu? (*Ridim Efesas 5:15, 16.*) Sam famle oli agri se bambae oli no wajem televisin tumas mo oli no yusum kompiuta tumas. Sam narafala oli traehad blong joen wanples wan taem evri dei blong kakae. Famle wosip i mekem

4. ?From wanem plante famle oli no stap toktok gud?

5, 6. ?Sam papa mo mama oli mekem wanem blong oli save spenem moa taem wetem pikinini blong olgeta?

ol papa mo mama wetem ol pikinini, oli fren gud moa, mo oli save tokbaot ol samting we i blong mekem bilif blong olgeta i strong. I gud blong makem aot wan taem, maet wan aoa evri wik blong mekem famle wosip. Ale, bambae evriwan long famle oli lanem blong toktok gud wanples. Be i gat sam narafala samting moa we famle i mas mekem. Hemia se evriwan i mas toktok gud oltaem, i no long taem blong famle wosip nomo. Bifo we pikinini blong yu i go long skul, yu mas talem sam gudfala toktok we i givhan long hem. Yu tokbaot vas blong dei wetem hem, mo yu prea wetem hem. Sipos yu mekem olsem, bambae pikinini i harem gud taem hem i stap long skul.

⁶ Sam papa mo mama oli mekem plante jenis long laef blong olgeta, blong oli save spenem moa taem wetem pikinini blong olgeta. Lora,* wan mama we i gat tu pikinini, hem i mekem olsem. Hem i no moa wok fultaem from we hem i wantem spenem moa taem wetem tufala pikinini blong hem. Hem i talem se: “Fastaem, evri moning, mifala evriwan i mas hareap blong go long wok mo long skul. Taem mi kambak long haos, haosgel i mekem tufala pikinini blong mi i slip finis. Be naoia mi no moa wok fultaem, taswe mifala i traehad blong yusum gud mane blong

* Mifala i jenisim nem blong hem.

mifala. Nating se i olsem, mi harem gud moa from we mi save storian wetem tufala pikinini blong mi, mi save lesin long tufala taem tufala i talemaot tingting blong tufala mo problem blong tufala. Mi lesin long samting we tufala i talem long prea blong tufala. Biaen, mi givhan long tufala, mi lefemap tingting blong tufala, mo mi tijim tufala."

YUFALA I "MAS RERE OLTAEM BLONG LESIN"

⁷ Man we i raetem buk ya *For Parents Only*, i askem kwestin long plante yangfala, blong oli talemaot samting we i blokem olgeta blong oli no toktok wetem papa mo mama blong olgeta. Hem i talem se: "Wan stamba samting we ol yangfala ya oli komplem from, hemia se papa mo mama blong olgeta, oli no lesin long olgeta taem oli toktok." Be i no ol pikinini nomo we oli komplem from samting ya. Ol papa mo mama tu oli talem se pikinini blong olgeta i no stap lesin long olgeta. Taswe, i gud se evriwan long famle i lesin gud taem narafala i toktok, olsem nao bambae oli save toktok gud wanples oltaem.—*Ridim Jemes 1:19*.

⁸ Yufala ol papa mo mama, ?yufala i stap lesin taem pikinini blong yufala i talem wan samting long yufala? I tru, maet i no isi blong mekem olsem taem ya taed, no taem samting we hem i talem i no impoten. Be yu mas tingbaot se samting we yu yu ting se i no impoten, be i impoten tumas long pikinini blong yu. Ol papa mo mama we oli "rere blong lesin," oli no lesingud nomo long wanem we pikinini i stap talem, be oli tingbaot fasin blong hem blong talem samting ya tu. Oli lesin long voes blong hem, oli lukluk fes blong hem, mo ol aksen blong hem we oli soemaot se hem i harem olsem wanem. I impoten tu blong askem kwestin long pikinini blong yu. Baebol i talem se: "Ol tingting blong man i olsem wota long wel, we i godaon we i godaon, be man we i save luksave ol had samting, hem i save faenemaot ol tingting olsem." (Prov. 20:5) Yu mas gat fasin luksave sipos yu wantem pulum pikinini blong yu, blong hem i tokbaot sam samting we hem i no wantem talemaot.

⁹ Yufala ol pikinini, ?yufala i stap obei long papa

7. ?Wanem samting we papa mo mama mo pikinini tu, oli stap komplem from?

8. ?Papa mo mama i save mekem wanem blong lesingud long pikinini blong tufala?

9. ?From wanem pikinini i mas lesin long papa mo mama blong hem?

mo mama blong yufala? Baebol i talem se: "Pikinini blong mi, yu yu mas lesin gud long ol samting we mi wetem mama blong yu, mitufala i stap tijim yu long hem, mo yu no mas lego ol samting ya." (Prov. 1:8) Yu mas tingbaot se papa mo mama blong yu, tufala i lavem yu mo tufala i wantem givhan long yu. Taswe, i gud we yu lesin mo yu obei long tufala. Olsem nao, yu soemaot se yu waes. (Efes. 6:1) Bambae i moa isi long yu blong obei, sipos papa mo mama blong yu, tufala i toktok gud wetem yu, mo sipos yu save se tufala i lavem yu. Yu mas talemaot tingting blong yu long tufala. Ale, bambae tufala i kasem save moa long yu. Be i gud we yu tu yu traehad blong kasem save long tingting blong tufala.

¹⁰ Yu mas lukaotgud taem yu lesin long ol advaes blong ol narafala yangfala we oli gat sem yia olsem yu. Maet oli talem samting we yu yu wantem harem nomo, be i no givhan long yu nating. Maet samting we oli talem i spolem yu tu. Ol yangfala oli no waes mo oli no gotru long ol samting blong laef we ol bigman oli gotru long hem finis. Taswe, plante yangfala oli no luksave nogud samting we i save kamaot from fasin we oli mekem. Yu traem tingbaot Rehoboam, pikinini blong King Solomon. Taem hem i kam king blong Isrel, hem i no folem ol gudfala toktok blong ol olfala we oli advaes blong hem. Be hem i girap, i go luk ol yangfala we oli grup wetem hem, mo i folem ol nogud advaes blong olgeta. From samting ya, bighaf blong ol man oli no moa wantem we hem i rul long olgeta. (1 King 12:1-17) Yes, yu no mas mekem olsem Rehoboam. Yu mas wok had blong mekem se rod i open oltaem, blong papa mo mama blong yu, tufala i save toktok wetem yu. Yu mas talemaot tingting blong yu long tufala. Yu mas folem ol advaes we tufala i givim long yu, mo yu lanem samting long waes blong tufala.—Prov. 13:20.

¹¹ Papa mo mama. Sipos yu no wantem se pikinini blong yu i go askem advaes long ol fren blong hem, yu mas mekem se hem i no fraet blong kam toktok wetem yu. Hem i mas harem se yu yu fren blong hem. Wan yangfala sista i talem se: "Sipos mi talem nem blong wan boe nomo, papa mo mama tufala i harem nogud. Mo long taem olsem, mi tu mi harem nogud, ale mi no moa wantem toktok." Wan

10. ?Yumi lanem wanem long stori blong Rehoboam?

11. ?Wanem i save kamaot sipos papa mo mama i no fren gud wetem pikinini?

narafala yangfala sista i talem se: "Plante yangfala oli wantem se papa mo mama blong olgeta i givim advaes long olgeta. Be sipos yangfala i askem advaes, be tufala i no wantem save long hem, bambae hem i go askem long wan narafala man, nating se man ya i no gat plante save long laef olsem papa mo mama blong hem." Yes, sipos yu glad blong lesin long eni samting we pikinini blong yu i talem, bambae pikinini blong yu i glad blong toktok gud wetem yu, mo bambae hem i glad blong lesin taem yu givim advaes long hem.

YUFALA I "NO MAS HAREAP BLONG TOKTOK"

¹² Wan narafala samting we i save blokem pikinini blong i no moa toktok long papa mo mama, hemia taem hem i talem wan samting long tufala, be tufala i kam kros, no tufala i mekem samting blong soemaot se tufala i no glad. I tru, ol Kristin papa mo mama oli wantem lukaotgud long pikinini blong olgeta. I gat plante samting long ol las dei ya, we oli save spo-lem bilif blong ol pikinini, taswe ol papa mo mama oli wari bigwan long pikinini blong olgeta. (2 Tim. 3: 1-5) Be plante taem, ol samting we ol papa mo mama oli mekem blong protektem pikinini, maet pikinini i luk se i had tumas.

¹³ Ol papa mo mama we oli waes, oli no hareap blong talemaot tingting blong olgeta, taem pikinini i toktok wetem olgeta. I tru se i no isi blong stap kwaet taem pikinini blong yu i talem wan samting long yu we i mekem yu wari, no yu kros. Be long taem olsem, i impoten we yu lesingud bifo we yu ansa. King Solomon i talem se: "Yu mas lesin long tok blong ol man fastaem, nao biam bambae yu save givim ansa long olgeta. Sipos no, fasin ya i soemaot we yu no gat hed, mo bambae yu sem bigwan from." (Prov. 18:13) Sipos yu stap kwaet, bambae pikinini blong yu i gohed blong talemaot plante moa samting long yu. Yu mas kasem save long ful stori blong hem, bifo we yu givhan long hem. Yu no mas mekem pikinini i "sek long ol tok" we yu talem from we yu harem nogud. (Job 6:1-3) Ol gudfala papa mo mama. Yufala i mas yusum sora blong yufala blong traem kasem

save long pikinini blong yufala, mo yufala i mas yusum tang blong yufala blong talem ol tok we oli givhan long hem.

¹⁴ Ol pikinini. Yufala tu i "no mas hareap blong toktok." Sipos papa mo mama i talem wan samting, yu no mas hareap blong blokem tok blong tufala. God nao i givim wok long tufala blong tufala i tijim yu. (Prov. 22:6) Maet tufala i bin kasem sem trabol olsem yu. Mo ating tufala i harem nogud from ol mastik we tufala i mekem taem tufala i yangfala, mo tufala i no wantem se yu mekem semfala mastik ya. From samting ya, yu mas luk papa mo mama blong yu olsem we tufala i fren blong yu, be i no ol enemi blong yu. Mo tu, yu mas luk tufala olsem we tufala i man blong givim advaes long yu, be i no ol man blong agensem yu. (*Ridim Ol Proverb 1:5.*) 'Yu mas ona long papa mo mama blong yu.' Mo yu mas soemaot long tufala se yu lavem tufala olsem we tufala i lavem yu. Olsem nao, bambae i moa isi long tufala blong tufala i 'stretim yu mo tijim yu,' olsem we Jehova i wantem.—Efes. 6:2, 4.

YUFALA I "NO MAS HAREAP BLONG KROS"

¹⁵ I no oltaem we yumi gat longfala tingting long ol man we yumi laekem olgeta. Aposol Pol i raetem leta i go long ol Kristin long Kolosi, we tabu spirit i makemaot olgeta. Hem i talem se: "Yufala ol man we i mared, yufala i mas lavem ol woman blong yufala. Yufala i no mas mekem i strong long olgeta, oltaem yufala i mas mekem i gud long olgeta. Ol papa mo mama. Bambae yufala i no stap mekem ol samting we i save mekem ol pikinini blong yufala oli kros, from we sipos yufala i stap mekem olsem, bambae tingting blong olgeta i foldaon." (Kol. 1:1, 2; 3:19-21) Pol i talem long ol Kristin long Efesas se: "Yufala i mas lego olgeta fasin blong kros, yufala i no mas hollem kros, mo yufala i no mas kros kwik. Mo taem yufala i kros, yufala i no mas sakem tok blong yufala i go antap, mo yufala i no mas tok nogud long yufala." (Efes. 4:31) Yumi mas mekem ol fasin we i olsem frut blong tabu spirit blong God. Yumi mas mekem tingting blong yumi i longfala, yumi kwaet man, mo

¹⁴. ?From wanem ol pikinini oli no mas hareap blong toktok?

¹⁵. ?Wanem i save givhan long yumi blong yumi gat longfala tingting, mo yumi no kam kros long olgeta we yumi laekem olgeta?

¹². ?Wanem fasin blong papa mo mama we i save blokem pikinini blong i no moa toktok wetem tufala?

¹³. ?From wanem ol papa mo mama oli no mas hareap blong talemaot tingting blong olgeta?

yumi blokem samting we yumi nomo i wantem. Ol fasin ya bambae oli givhan long yumi, blong yumi no kam kros taem yumi harem nogud.—Gal. 5:22, 23.

¹⁶ Yu traem tingbaot Jisas. Long laswan naet we hem i kakae wetem ol aposol blong hem, tingting blong hem i kam hevi tumas. Hem i save se i no longtaem bambae hem i harem nogud tumas mo i ded. Hem i tingbaot tu se ded blong hem bambae i leftemap nem blong papa blong hem, mo i mekem nem ya i tabu. Mo tu, ded blong hem bambae i mekem se ol man oli save kasem laef we i no save finis. Be long naet ya we oli stap kakae wanples, “ol man blong hem oli rao from tingting ya se hu nao i hae moa long olgeta.” Jisas i no tok strong long olgeta. Hem i toktok gud long olgeta blong mekem olgeta oli tingting. Hem i pulum olgeta blong oli tingbaot se oltaem oli stap wetem hem long ol hadtaem we hem i gotru long olgeta. Nating se Setan i talem finis se hem i wantem mekem plante trabol long ol aposol blong traem olgeta, be Jisas i trastem olgeta se bambae oli stanap strong. Mo hem i mekem wan kontrak wetem olgeta.—Luk 22:24-32.

¹⁷ Ol pikinini tu oli no mas kros be oli mas stap kwaet. Antap moa taem oli kam yangfala. Maet yu ting se samting we papa mo mama i talem, i soemaot se tufala i no trastem yu. Be wan samting we i save givhan long yu blong yu no kros, hemia se yu mas luksave se papa mo mama blong yu, tufala i wari long yu from we tufala i lavem yu. Taem yu stap kwaet mo yu lesin long tufala, mo yu mekem samting we tufala i askem yu blong mekem, bambae tufala i respektem yu mo tufala i trastem yu moa. Ale, bambae tufala i letem yu yu fri moa blong mekem sam samting we yu wantem. Mo taem yu bos long tingting blong yu, hemia i soemaot se yu waes. King Solomon i talem se: “Man we i no gat hed, hem i save soemaot long fes blong ol man we hem i kros, be man we i gat hed, tingting blong hem i longfala, mo hem i save holem kros blong hem.”—Prov. 29:11.

¹⁸ Yufala ol papa mo mama, mo ol pikinini, yufala

16. ?Jisas i stretem tingting blong ol aposol olsem wanem? ?Fasin blong hem i soemaot wanem?

17. ?Wanem i save givhan long pikinini blong i no kros, be i stap kwaet?

18. ?Lav i gat paoa olsem wanem blong mekem se man i toktok gud wetem narafala?



?Yu yu lesin taem pikinini blong yu i talem wan samting?

i no mas harem nogud sipos long famle blong yufala, yufala i stap traehad yet blong toktok gud. Yufala i mas gohed blong toktok gud insaed long famle, mo yufala i mas gohed gud tu long trutok. (3 Jon 4) Long niufala wol, bambae ol man oli kam stret gud olgeta, nao oli save toktok gud long olgeta. Bambae i no gat wan man we i gat rong tingting long narafala from samting we hem i talem. Tede, plante long yumi, yumi mekem samting we biae yumi sore from. Taswe, i gud we yumi talem sore from samting we yumi mekem. Yumi mas fofogivim yumi. Yumi mas ‘kam wan kampani nomo, from we yumi stap lavlavem yumi.’ (Kol. 2:2) Lav i gat paoa. ‘Man we i stap lavem man, tingting blong hem i longfala, mo hem i gat sore long man. Hem i no save kros kwik, mo i no save stap kros longtaem. Hem i no save letem wan samting i daonem tingting blong hem. Oltaem hem i stap bilif strong long God, mo i stap putum tingting blong hem i strong long hem. Maet bigfala trabol i save kasem hem, be tingting blong hem i no save foldaon.’ (1 Kor. 13:4-7) Yumi mas gohed blong lavem ol man, nao bambae yumi save toktok gud long ol narafala. Bambae yumi harem gud long famle blong yumi mo bambae yumi presem Jehova tu.

Laef Blong Mifala i No Blong Nating Nomo

PATRICIA SMITH | TALEM STORI YA

SMOLTAEM afta we boe blong mi Gary i bon, long 1958, mi luksave se wan samting i rong long hem. Nating se i olsem, i tekem ten manis blong ol dokta oli faenemaot samting we i rong long hem, mo i tekem faef yia moa, blong ol spesel dokta blong London oli talemaot sik blong hem. Naen yia afta, gel blong mi Louise i bon, mo mi mi harem nogud tumas taem mi luk sam saen we i soemaot se hem i kasem sem sik olsem Gary, be i moa nogud.

Dokta i talem long mi long kaen fasin, se: "Tufala pikinini blong yu, tufala tugeta i gat sik ya *Laurence-Moon-Bardet-Biedl* (LMBB),* mo mi sore tumas blong talem se sik ya i no gat meresin blong hem." Long taem ya, ol man oli no gat tumas save long saed blong sik ya. Man we i gat sik ya, ae blong hem i stat blong kam nogud nao hem i save blaen, hem i fatfat tumas, sam narafala fingga blong leg no blong han blong hem oli gru, hem i gru slo, hem i no save yusum gud ol haf blong bodi blong hem, hem i gat sik blong suga, ol bun blong hem oli soa, mo kidni blong hem i no wok gud. Yes, i no isi nating blong lukaot long tufala pikinini blong mi. Wan stadi we oli mekem i no longtaem, i soemaot se long ol 125,000 man long Ingran, i gat 1 long olgeta i kasem sik ya. Nating se i olsem, i luk olsem se plante moa man oli stap kasem sik ya.

JEHOVA I "PLES BLONG HAED" BLONG MIFALA

Smoltaem afta we mi mared, mi bin storian wetem wan Witnes blong Jehova, mo kwiktaem nomo, mi luksave se samting we ol Witnes oli tijim, hem i trutok. Be man blong mi i no intres nating. Hem i gat wok, mo wok blong hem i mekem se mifala i muv plante taem blong go long narafala ples. Samting ya i mekem se mi tu mi no save go long ol miting. Nating se i olsem, mi gohed blong ridim Baebol mo blong

* *Laurence-Moon-Bardet-Biedl*, hem i nem we fo dokta oli putum afta we oli faenemaot se sik ya i kamaot taem we papa mo mama tugeta, tufala i gat problem long saed blong ol sel we i stap long bodi blong tufala. Tede, ol man oli kolek sik ya se *Bardet-Biedl*. Sik ya i no gat meresin blong hem.

prea long Jehova. Mi mi harem gud tumas taem mi ridim se: "Hae God [Jehova]. Yu yu sefples blong olgeta ya we ol man oli stap spolem olgeta. Yu yu ples blong haed blong olgeta long taem blong trabol. . . . Olgeta we oli kam long yu, yu no save lego wan long olgeta."—Sam 9:9, 10.

Gary i gat problem long ae, taswe taem hem i gat sik yia, mi sanem hem i go long wan spesel skul long saot blong Ingran. Evritaem, hem i ring long mi blong tokbaot ol samting we oli mekem hem i wari, ale mi givhan long hem blong i kasem save long ol stamba tijing blong Baebol. Sam yia afta we Louise i bon, mi tu mi sik. Mi kasem sik ya *multiple sclerosis*, mo wan narafala sik we i mekem se mi no save stanap stret mo mi no save yusum ol leg mo han blong mi, mo tu ol bodi blong mi oli soa tumas. Long 1974, Gary i finisim skul blong hem taem hem i gat 16 yia. Ae blong hem i stap kam moa nogud. Long 1975, oli putum nem blong hem long lis blong ol man we oli blaen. Long 1977, man blong mi i lego mifala.

Smoltaem afta we Gary i finis skul, mi mi tekem baptaes mo mifala i joen long wan gudfala kongregesen we i keagud long mifala. Mi glad tumas we wan elda i givhan long Gary long yangtaem blong hem, blong hem i save wanem blong mekem taem hem i luk ol jenis we oli stap hapen long bodi blong hem. Sam long ol Witnes oli givhan long mi long ol wok blong haos. Bienen, wan ogenaesesan long ples blong mifala we i stap lukaot long ol handikap, oli jusum faef Witnes blong oli kam stap givhan long mifala. !Hemia wan nambawan blesing!

Gary i gohed gud long trutok, mo hem i baptaes long 1982. Hem i wantem tumas blong mekem haf-taem paenia, ale mi tu mi wantem givhan long hem blong mekem wok ya. Mitufala i mekem haftaaem paenia blong plante yia. Boe blong mi i glad tumas taem eria elda blong mifala i askem long hem se: "Gary, yu no wantem mekem wok blong fultaem paenia?" Toktok ya i leftemap tingting blong Gary bigwan, mo long 1990, hem i kam wan fultaem paenia.

Dokta i katem Gary tu taem blong jenisim bun we i stap long ples blong strap, faswan long 1999 mo naranan long 2008. Be sik blong Louise i moa nogud, from we taem hem i bon, hem i blaen finis. Mo taem mi luk se hem i gat wan moa fingga long leg blong hem, mi luksave se hem tu i gat sem sik olsem Gary. Taem oli jekem hem long hospital, oli faenemaot se hem i gat plante problem insaed long bodi blong hem. Ol dokta oli katem hem plante taem. Mo faef taem oli katem kidni blong hem. Hem tu i gat sik blong suga olsem Gary.

Louise i save se bambae i gat sam trabol i kamaot taem oli katem hem. From samting ya, hem i storian wetem dokta blong katem man, mo wetem ol narafala dokta mo ol nes long hospital. Hem i eksplenem from wanem hem i no wantem se oli putum blad long hem. Samting we i kamaot se, hem i fren gud wetem olgeta we oli lukaot long hem.

LAEF BLONG MIFALA I NO BLONG NATING NOMO

Mifala i mekem plante samting long haos blong mifala blong wosip long Jehova. Fastaem, taem ol niu teknoloji oli no kam yet, mi stap spenem plante aoa blong rid long Gary mo Louise. Be naoia i gat ol CD, mo ol DVD, mo ol rikoding we yumi save karemaot long Websaet ya www.jw.org. Ol samting ya oli givhan long mifala evriwan blong harem gud long ol defren program blong stadi Baebol evri wik, mo mifala i save givim ol gudfala ansa long ol Kristin miting.

Samtaem, Gary i lanem baehat ol ansa blong hem, mo sipos hem i gat wan tok long Tiokratik Skul, hem i naf blong mekem tok ya long prapa toktok blong hem. Long 1995, hem i kam wan man blong givhan. Hem i bisi oltaem blong welkamem ol brata mo sista long Haos Kingdom, mo hem i givhan tu long brata we i lukaot long saon long taem blong miting.

Ol Kristin brata oli joen wetem Gary long wok blong prij. Plante taem oli pusum hem long wiljea, from we ol joen blong bodi blong hem oli solap mo oli soa. Wan brata i givhan long hem blong mekem Baebol stadi long wan man we i wantem save trutok. Mo Gary i givhan long wan Witnes we i no moa prij blong 25 yia. Naoia, tufala man ya tufala i stap kam long ol miting.

Taem Louise i gat naen yia, bubu woman blong hem i lanem hem blong somap, ale mi mo wan long ol sista we oli stap lukaot long hem, mitufala i tijim hem blong somap ol pija long kaliko. Hem i laekem tu-

mas blong somap. Ale, hem i mekem plante naes blangket blong ol bebi, mo blong ol olfala brata mo sista long kongregesen. Hem i mekem ol kad tu mo i putum ol pija long hem. Biae hem i sanem long ol narafala. Olgeta we oli kasem ol kad ya oli glad tumas. Taem Louise i yangfala yet, hem i lanem olsem wanem blong yusum masin blong raet. Naoia, hem i gat wan kompiuta, mo hem i save raet long ol fren blong hem oltaem. Louise i baptaes taem hem i gat 17 yia. Long taem blong seremaot ol spesel traket, mitufala i glad blong mekem wok blong haftaem paenia tuge-ta. Louise i mekem olsem Gary. Hem i rimemba ol vas. Ale taem hem i prij, hem i save tokbaot bilif we hem i gat long ol promes we God bambae i mekem i kamtru long wol ya. Hemia ol promes ya se "ae blong ol blaen man bambae i open," mo "bambae i no gat wan man ples we i save talem se: 'Mi mi sik.'"—Aes. 33:24; 35:5.

!Mifala i harem gud tumas from ol gudfala trutok ya we oli stap long Tok blong Jehova! Hat blong

mifala i fulap long glad, mo mifala i wantem tumas blong talem tangkiu long ol brata mo sista long kongregesen blong mifala, from ol samting we oli mekem blong givhan long mifala. Sipos i no olgeta, bambae mifala i no save mekem ol wok olsem. Mo from we Jehova i stap givhan long mifala, laef blong mifala i no blong nating nomo.



!Mifala i harem gud tumas from ol gudfala trutok ya we oli stap long Tok blong Jehova!



YU MAS LUKAOTGUD LONG PRESEN YA WE GOD I PUTUM I STAP BLONG YU

*“Oltaem yufala i mas
agens long ol rabis fasin,
be yufala i mas holem-
strong ol gudfala fasin.”*

—ROM 12:9.

?BAMBAE YU YU ANSA OLSEM WANEM?

?Wanem presen ya we God i
putum i stap blong yumi?

?Wanem wonging we yumi lanem
long stori blong Esao?

?Yumi mas mekem wanem
blong yumi no lusum presen ya
we God i putum i stap blong
yumi?

PLANTE milian man oli jusum blong mekem wok blong Jehova mo blong biaen long Jisas Kraes. (Mat. 16:24, NW; 1 Pita 2:21) Yumi tinghae long desisen ya blong givim laef blong yumi long Jehova. Yumi no mekem desisen ya from we yumi save sam vas nomo blong Baebol. Be yumi jusum blong givim laef blong yumi long God from we yumi stadi gud long Baebol. Samting ya i mekem se yumi kasesem save long trutok we i mekem bilif blong yumi i strong. Trutok ya i laenap wetem presen we Jehova i putum i stap blong olgeta we oli ‘save hem, mo oli save Jisas kraes we hem i sanem hem i kam.’—Jon 17:3; Rom 12:2.

² Sipos yumi wantem gohed blong holemtaet ol kristin fasin, yumi mas mekem ol desisen we oli waes, we Jehova i glad long olgeta. Long stadi ya, bambae yumi tokbaot ol impoten kwestin ya: ?Wanem presen ya we God i putum i stap blong yumi? ?Yumi mas gat wanem tingting long presen ya? ?Yumi mas mekem wanem blong yumi save kasesem presen ya? ?Wanem bambae i givhan long yumi blong yumi mekem ol desisen we oli waes?

?WANEM PRESEN YA WE GOD I PUTUM I STAP BLONG YUMI?

³ Wan smol grup blong ol Kristin bambae oli kasesem ‘ol gudgudfala samting ya we God i putumgud olgeta oli stap long heven, se oli blong olgeta. Long ples ya ol samting ya oli no save kam nogud, mo oli no save kam roten, mo oli no save lus.’ Ol Kristin ya oli gat nambawan janis ya blong rul wetem Kraes long heven. (1 Pita 1: 3, 4) Sipos ol Kristin ya oli wantem kasesem presen ya, oli mas “bon bakegen.” (Jon 3:1-3) ?Be olsem wanem long plante milian “narafala sipsip” blong Jisas we oli stap givhan long ol tabu Kristin blong talemaot gud nius blong Kingdom? ?Wanem presen we bambae oli kasesem? (Jon 10:16) Ol narafala sipsip ya bambae oli kasesem presen we Adam mo Iv tufala i neva kasesem samtaem. Hemia laef we i no

1, 2. (1) ?From wanem yumi jusum blong givim laef blong yumi long Jehova? (2) ?Wanem ol kwestin we yumi save askem long saed blong presen we God i putum i stap blong yumi?

3. ?Wanem presen we God i putum i stap blong (1) ol tabu Kristin, mo (2) ol “narafala sipsip”?

save finis long wan paradaes long wol. Long paradaes ya, ol man bambae oli no moa harem nogud, oli no moa ded, mo oli no moa krae from man we i ded. (Rev. 21:1-4) Taswe, Jisas i talem long rabis man we i hang long pos klosap long hem, i se: 'Tru mi mi talem long yu tede, bambae yu yu stap wetem mi long paradaes.'—Luk 23:43, *Nyutesteman wetem Ol Sam long Bislama*.

⁴ Tede yumi stap harem gud long sam blesing we oli joen wetem presen ya we bambae yumi kasem. From we yumi bilif se 'Jisas Kraes i pem rod finis, blong olgeta man oli go fri,' yumi gat pis long tingting blong yumi mo yumi fren gud wetem God. (Rom 3:23-25) Yumi kasem save long ol nambawan promes we oli stap long Baebol. Mo tu, yumi harem gud tumas blong joen long bigfala kampani blong ol brata mo sista raon long wol. Mo yumi gat nambawan blesing ya blong stap olsem ol Witnes blong Jehova. !Taswe, yumi wantem lukaot gud long presen ya we God i putum i stap blong yumi!

⁵ Sipos yumi no wantem lusum nambawan presen we God i putum i stap blong yumi, yumi mas lukaot long ol trik blong Setan. Oltaem nomo Setan i traem blong pulum ol man blong God. Hem i wantem se oli mekem sam samting we i save spolem olgeta, nao oli no moa kasem presen we God i putum i stap blong olgeta. (Nam. 25:1-3, 9) Setan i save se taem blong hem i sot tumas, taswe hem i gohed strong moa blong traem pulum yumi i go krangke. (*Ridim Revelesen 12:12, 17*) Sipos yumi wantem 'stanap strong long ol giaman trik blong Setan,' yumi mas gohed blong tinghae long presen ya we God i putum i stap blong yumi. (Efes. 6:11) Stori blong fasbon boe blong Aesak, hemia Esao, i givim woning long yumi long saed ya. Yumi mas tingting gud long tijing we i kamaot long stori ya.

YU NO MAS FOLEM FASIN BLONG ESAO

⁶ Klosap 4,000 yia bifo, Aesak mo Rebeka tufala i gat tu pikinini boe we tufala i twin, nem blong tufala Esao mo Jakob. Taem tufala twin ya i stap gruap, tufala i no moa gat sem fasin mo tufala i no laekem sem

4. ?Wanem sam blesing we yumi stap harem gud long olgeta tede?

5. ?Setan i traem blong mekem wanem long ol man blong God? ?Wanem i save givhan long yumi blong yumi stanap strong long ol giaman trik blong hem?

6, 7. ?Esao hem i wanem kaen man? ?Mo wanem presen we bambae hem i kasem?

samting. "Esao i kam wan nambawan man blong lukaot mit long bus, we i no wantem stap long haos, oltaem i wantem go stap long bus." Be "Jakob i kam wan kwaet man nomo, we oltaem i wantem stap long haos." (Jen. 25:27) Wan man we nem blong hem Robert Alter mo we i stap transletem Baebol, i talem se: "Hibru wod we oli tanem i kam 'kwaet man,' i minim wan man we tingting blong hem i klin mo we i fagud long God."

⁷ Taem Esao mo Jakob tufala i gat 15 yia, bubu blong tufala, Ebrahim, i ded. Be promes we Jehova i mekem long Ebrahim i no lus. Sam taem biae, Jehova i talem promes ya bakegen long Aesak. Hem i talem se, olgeta we oli kamaot biae long Ebrahim bambae oli blesem ol man blong ol narafala kantri. (*Ridim Ol Wok 3:25*.) Promes ya i soemaot se pikinini we Jenesis 3:15 i tokbaot, we i minim Mesaea, bambae i kamtru long laen blong Ebrahim. Esao hem i fasbon boe blong Aesak, taswe Mesaea bambae i kamaot long laen blong hem. !Hemia wan nambawan presen we Esao bambae i kasem! ?Olsem wanem? ?Hem i tinghae long presen ya?

⁸ Wan dei, taem Esao i kambak long bus, hem i luk we Jakob "i stap kukum ol red bin blong mekem supsup long hem." Ale Esao i talem long hem se: "!Ei, mi mi hanggri tumas! Yu tekem red supsup ya i kam." Be Jakob i ansa long hem i se: "Sipos yu mekem promes se bambae yu no moa save holem ol raet we yu gat from we yu yu fasbon, mo yu glad blong givim ol raet ya long mi, bambae mi save givim sam supsup long yu." ?Esao bambae i mekem wanem? Hem i girap i talem se: "!Sipos mi ded, samting ya bambae i no save givhan long mi!" !Yes, Esao i jusum supsup blong Jakob, be i no moa wantem ol raet blong hem olsem fasbon! Jakob i wantem se Esao i promes blong lego ol raet blong hem, ale hem i talem long Esao se: "Be fastaem yu mas mekem wan strong promes, se ol raet we naoia yu yu holem, bambae yu no moa save holem, mi nomo bambae mi holem." Esao i no moa tingting tu taem, hem i lego ol raet blong hem olsem fasbon. Biae long samting ya, "Jakob i tekem supsup ya wetem bred i kam, i givim long hem. Hem i kakae finis, nao i girap, i wokbaot i go. Samting ya i soemaot we Esao i no tinghevi nating long ol samting ya we hem

8, 9. (1) ?Esao i mekem wanem long ol raet we hem i holem olsem fasbon? (2) Plante yia biae, ?Esao i kasem save long wanem samting, mo hem i mekem wanem?



Yu no mas mekem se yu lusum presen ya we God i putum i stap blong yu

blong hem olsem fasbon, mo i klia se hem i no lavem Jehova. Mo tu, Esao i no tingbaot ol trabol we bambae ol pikinini blong hem oli kasem from samting we hem i mekem. Be long saed blong Jakob, i defren olgeta. Jakob i rili tinghae long presen we bambae hem i kasem. Yu traem tingbaot. Papa mo mama blong hem, tufala i givim advaes long wanem woman we hem i mas jusum blong i kam woman blong hem. Ale Jakob i obei long advaes blong tufala. (Jen. 27:46–28:3) Be, blong hem i faenem wan woman olsem, hem i mas gat longfala tingting mo i mas lego plante samting. Nating se i olsem, Jakob i kam wan bubu blong Mesaea. ?God i gat wanem tingting long Esao mo Jakob? Jehova i talem long profet Malakae, i se: “Jakob wetem olgeta we oli kamaot biae long hem, mi mi lavem olgeta moa. Be Esao, wetem olgeta we oli kamaot biae long hem, mi mi no laekem olgeta nating, mi agens long olgeta.” —Mal. 1:2, 3.

¹¹ ?Olsem wanem? ?Samting we Baebol i talem long saed blong Esao, i stret long ol Kristin tede? Yes, i stret long olgeta tu. Aposol Pol i givim woning long ol man blong God, i se: “I no mas gat wan long yufala we i slip olbaot, no we i no tinghae long ol samting we oli tabu, olsem Esao. Hem i salem raet we hem i gat olsem fasbon, from wan smol pis mit nomo.” (Hib. 12: 16, *King James Version*) Woning ya i stret yet long ol Kristin. Yumi mas gohed blong tinghae long ol samting we oli tabu. Hemia bambae i givhan long yumi blong yumi no mekem samting we tingting blong yumi nomo i wantem, nao yumi lusum presen ya we God i putum i stap blong yumi. ?Be from wanem Pol i joenem fasin blong slip olbaot wetem fasin blong Esao? From we sipos yumi gat sem fasin olsem Esao, bambae yumi sakemaot ol samting we oli tabu, ale yumi mekem ol rabis fasin we tingting blong yumi nomo i harem gud long hem, olsem fasin blong slip olbaot.

NAOIA I TAEM BLONG YU REREM HAT BLONG YU

¹² Yumi ol man blong Jehova, yumi no mekem sam samting we oli save pulum yumi blong foldaon long

11. (1) ?From wanem stori blong Esao i stret long ol Kristin tede? (2) ?From wanem Pol i joenem fasin blong slip olbaot wetem fasin blong Esao?

12. (1) ?Setan i mekem wanem blong traem pulum yumi? (2) ?Taem yumi mas mekem wan desisen we i no isi, wanem sam eksampol long Baebol we oli save givhan long yumi?

nomo i gat raet blong mekem from we i fasbon blong papa blong hem.”—Jen. 25:29-34.

⁹ Sam yia biae, Aesak i ting se bambae hem i ded i no longtaem. Ale Rebeka i mekem plan se Jakob nao bambae i kasem raet ya blong fasbon we Esao i lego finis. Taem Esao i kasem save se hem i mekem wan samting we i krangke, hem i go luk Aesak mo i talem se: “!Papa! !Plis yu blesem mi tu! . . . ?I no moa gat sam samting i stap we yu no talemaot yet, we yu save askem long God blong i givim long mi, blong blesem mi?” Taem Aesak i talem se hem i no save jenisim blesing we hem i givim finis long Jakob, Esao ‘i krae bigwan.’—Jen. 27:30-38.

¹⁰ ?Wanem fasin blong Esao we stori ya i soemaot? Esao i soemaot se hem i tinghae moa long ol samting we tingting blong hem i wantem. Be hem i no wantem kasem ol blesing we bambae oli kamaot from ol raet blong hem olsem fasbon. Esao i no tinghae long raet

10. ?Jehova i gat wanem tingting long Esao mo Jakob? ?Mo from wanem?

rabis fasin blong man wetem woman. Be yumi prea long Jehova God blong i givhan long yumi blong no foldaon taem narafala i pulum yumi blong brekem loa blong hem. (Mat. 6:13) Be taem yumi stap traehad blong holemstrong long bilif blong yumi, Setan tu i gohed strong blong traem spolem bilif blong yumi. (Efes. 6:12) Hem i god blong rabis wol ya, taswe hem i save olsem wanem blong pulum yumi. Hem i yusum sam samting we tingting blong yumi nomo i wantem, blong traem yumi. Ol samting ya we oli stap traem yumi, oli sem mak nomo long ol samting we oli stap traem ol narafala man. (1 Kor. 10:8, 13) Yu traem tingbaot. Maet yu gat janis blong kasem wan samting we yu wantem tumas, be yu mas brekem loa blong God blong kasem samting ya. ?Bambae yu mekem wanem? ?Bambae yu mekem olsem Esao, yu talem se: "Ihareap! !Givim long mi!?" ?No yu stanap strong mo yu ronwe long samting ya we i traem yu, olsem Josef i mekem taem woman blong Potifa i traem pulum hem? —*Ridim Jenesis 39:10-12.*

¹³ Plante brata mo sista blong yumi oli fesem sam samting we i traem olgeta, ale oli mas mekem wan desisen. Oli mas jusum se bambae oli mekem olsem Esao no oli mekem olsem Josef. Plante oli mekem ol desisen we oli waes, ale Jehova i glad long olgeta. (Prov. 27:11) Be sam Kristin oli jusum blong mekem olsem Esao, ale klosap oli lusum presen we God i putum i stap blong olgeta. Evri yia, bighaf blong olgeta we kongregesen i stretrem no i putumaot olgeta, hemia olgeta we oli mekem rabis fasin blong man wetem woman. !Taswe i impoten tumas we naoia yumi rerem hat blong yumi! !Mo yumi mas mekem bifo we yumi fesem ol samting we oli traem bilif blong yumi! (Sam 78:8) I gat tu samting we yumi mas mekem. Tufala samting ya oli save kam olsem wan stonwol we bambae i blokem yumi long ol samting we oli traem yumi, mo bambae oli givhan long yumi blong yumi mekem ol desisen we oli waes.

YU TINGTING GUD MO YU YUSUM OL SAMTING WE OLI GIVHAN LONG YU BLONG KAM STRONG

¹⁴ Fas samting we yumi mas mekem, se: **Yumi mas**

13. (1) ?Tede, plante Kristin oli mekem wanem desisen, olsem Josef bifo? ?Be olsem wanem sam Kristin oli jusum blong mekem olsem Esao? (2) ?Eksampol blong olgeta we oli jusum blong mekem olsem Esao, oli mekem yumi tingbaot wanem impoten samting?

14. ?Wanem ol kwestin we yumi mas tingting gud long olgeta?

tingting gud long frut we bambae i kamaot from samting we yumi mekem. Jehova hem i God ya we bambae i givim presen long yumi. Taswe yumi mas lavem hem. Sipos lav blong yumi long hem i bigwan, bambae yumi tinghae moa long presen ya we hem i putum blong yumi. Yu traem tingbaot. Sipos yumi lavem wan man, yumi no wantem mekem hem i harem nogud. Be yumi traehad blong mekem se hem i glad long yumi. Long sem fasin, sipos yumi wantem mekem samting we tingting blong yumi nomo i wantem, yumi mas tekem taem blong tingting gud long trabol we bambae yumi save kasem, mo ol narafala tu oli save kasem. Yumi mas askem se: 'Sipos mi mi mekem samting we mi nomo mi wantem, ?wanem bambae i hapen long fasin fren blong mi wetem Jehova? ?Samting ya bambae i mekem wanem long famle blong mi? ?Bambae i mekem wanem long ol brata mo sista blong mi long kongregesen? ?Ol narafala bambae oli foldaon from fol blong mi?' (Fil. 1:10) Mo tu, yumi save askem se: '?I stret we mi harem gud blong smoltaem long rabis samting we tingting blong mi nomo i wantem, be biaen, mi harem nogud bigwan from samting we mi mekem? ?Mi mi rili wantem krae bigwan olsem Esao, taem mi luksave se mi mekem wan samting we i nogud?' (Hib. 12:17) I gud yumi tingting gud long ol kwestin ya. Samting ya bambae i givhan long yumi blong yumi "agens long ol rabis fasin," be yumi "holemstrong ol gudfala fasin." (Rom 12:9) Antap moa, taem yumi lavem Jehova, hemia bambae i pulum yumi blong yumi holemstrong long presen ya we hem i putum i stap blong yumi. —Sam 73:28.

¹⁵ Seken samting we yumi mas mekem, se: **Yumi mas kam strong moa, blong yumi blokem ol samting we oli save traem yumi.** Jehova i mekem plante rod we oli givhan long yumi blong yumi kam strong, nao yumi save agensem ol samting we oli traem bilif blong yumi. Sam long ol rod ya, hemia ol Kristin miting, wok blong prij, prea, mo fasin blong stadi long Baebol. (1 Kor. 15:58) Evritaem we yumi talemaot ol trabol blong yumi long Jehova, mo evritaem we yumi prij, i olsem se yumi stap mekem stonwol blong yumi i kam strong moa, nao hem i save blokem ol samting we oli kam traem yumi. (*Ridim 1 Timoti 6:12, 19.*) Yumi mas wok had oltaem sipos yumi wantem se yumi kam

15. ?Wanem bambae i mekem se yumi save kam strong blong blokem ol samting we oli traem yumi?



Yumi lukaotem waes blong Jehova,
blong yumi save kam strong

strong. (Gal. 6:7) Ol Proveb japta 2 i soemaot samting ya.

**“OLTAEM YU MAS TRAEHAD
BLONG KASEM WAES YA”**

¹⁶ Ol Proveb japta 2 i pulum yumi blong yumi traehad blong kasem waes mo blong yumi kam naf blong tingting gud. Tufala fasin ya oli olsem ol gudfala presen. Oli givhan long yumi blong luksave samting we i stret no samting we i no stret, mo yumi mekem wan desisen we i stret. Mo oli givhan long yumi blong luksave sipos yumi mas bos long tingting blong yumi no yumi mekem samting we yumi nomo i wantem. Be sipos yumi wantem gat ol fasin ya, yumi mas rere blong wok had. Baebol i soemaot stamba trutok ya, i se: “Pikinini blong mi. **Yu mas** lanem ol samting ya we mi stap tijim yu long hem, mo yu no mas fogetem ol fasin ya we mi stap talem long yu se yu mas mekem.

16, 17. ?Sipos yumi wantem mekem ol desisen we oli waes, yumi mas mekem wanem?

Yu mas lesin long ol waestok ya, mo yu mas traehad blong haremsave olgeta. Yes, **yu mas** askem strong long Hae God, blong i mekem yu yu gat save, mo yu mas askem long hem oltaem, blong yu save haremsave mining blong ol strong samting. Oltaem **yu mas** traehad blong kasem waes ya, olsem we yu save traehad blong faenem silva, no wan narafala samting olsem, we man i bin berem. Sipos yu stap mekem olsem, bambae yu save kasem mining blong tok ya we i talem se, ‘Yu mas tinghevi long Hae God, mo yu mas ona gud long hem.’ Nao bambae yu save fasin blong hem moa, blong yu savegud hem. Hae God nomo i save mekem man i waes. Fasin blong save mo fasin blong haremsave, tufala i stap kamaot long hem nomo.”—Prov. 2:1-6.

¹⁷ Taswe, i klia se sipos yumi wantem se yumi naf blong mekem ol desisen we oli waes, yumi mas folem ol advaes ya blong Ol Proveb. **Yumi mas** letem ol tok blong Jehova oli jenisim ol fasin blong yumi, **yumi mas** prea oltaem long God blong i lidim yumi, mo **yumi mas** gohed blong lukaotem save blong God, olsem we yumi lukaotem wan sas samting we i haed. Sipos yumi mekem ol samting ya, bambae yumi naf blong stanap strong taem ol samting oli kam traem yumi.

¹⁸ Jehova bambae i givim waes mo save long man, mo bambae hem i mekem man i naf blong kasem save mo luksave ol samting. Hem i save givim ol presen ya long olgeta we oli wok had blong kasem. Taem yumi traehad blong lukaotem ol presen ya, mo yumi yusum olgeta long laef blong yumi, bambae yumi kam klosap long Jehova, we hem nao i givim ol presen ya. Ale, fasin fren we yumi gat wetem hem, bambae i olsem wan stonwol we i blokem gud yumi taem ol samting oli kam traem yumi. Sipos yumi kam klosap long God mo yumi ona gud long hem, bambae yumi no save mekem samting we i no stret. (Sam 25:14; Jem. 4:8) Taswe, i gud we yumi stap harem gud long fasin fren blong yumi wetem Jehova, mo yumi folem waes blong hem long laef blong yumi. Samting ya bambae i pulum yumi evriwan blong yumi mekem ol desisen we oli mekem Jehova i glad, mo i mekem se yumi no lusum presen ya we Jehova i putum i stap blong yumi.

18. ?Yu mas gohed blong mekem wanem, mo from wanem?

Oli Stanap Strong 'Taem Trabol i Kamtru'

TAEM Wol Wo Wan i stat long 1914, ol man oli luk se ol Baebol Studen oli no joen long faet. (Aes. 2:2-4; Jon 18:36; Efes. 6:12) ?Wanem i hapen long ol man blong God long Briten?

Long 1916, oli pasem wan loa long Briten we i talem se ol man we oli no mared, mo we oli gat 18 kasem 40 yia, oli mas joen long ami. Loa ya i talem se ol man nomo we "bilif mo skul" blong olgeta i blokem olgeta, bambae oli no joen. Gavman i stanemap sam kot blong oli jajem se hu man bambae i no joen long ami, mo hem i mas mekem wanem sipos hem i no joen long ami.

Nating se oli pasem loa ya, be ol ami oli putum samwe 40 Baebol Studen long kalabus, mo oli sanem 8 i go long Franis blong oli faet. Ol brata long Briten oli sek long fasin we gavman i mekem we i no stret nating. Ale oli raetem wan leta i go long Praeminista Herbert Asquith blong tok agensem samting we i hapen long ol Kristin ya, mo 5,500 brata oli saen long leta ya.

Biaen nius i kam se ol 8 brata we oli go long Franis, oli kasem panis blong ded, from we oli no wantem faet. Be taem ol brata ya oli stanap laen blong ol soldia oli sutum olgeta, ol soldia oli kasem oda se bambae oli no kilim olgeta oli ded, be oli putum olgeta long kalabus blong oli wok slef blong 10 yia. Ale, oli sanem ol 8 brata ya oli go wok long wan kalabus long Ingran.

Taem faet i stap gohed, wan narafala loa i kamaot we i talem se ol man we oli mared, oli mas go faet. Long Manchester, Ingran, Henry Hudson we i wan dokta mo i wan Baebol Studen, hem i pas long kot. Long 3 Ogis 1916, kot i talem se Henry i no mekem samting folem loa, ale oli mekem hem i faen mo oli putum hem long han blong ol ami. Long sem taem ya, long Edinburgh, Scotland, James Frederick Scott i pas long kot tu. Hem i wan *colporteur* (we tede yumi kolek paenia) mo hem i gat 25 yia. Be long taem ya, James i winim kes blong hem long kot. Gavman i wantem mekem apil, be hem i luksave se i moagud hem i lukluk long nambatri man we i mas pas long kot, hemia Herbert Kipps. Long taem ya, gavman i win mo oli mekem Herbert i faen mo oli putum hem long han blong ol ami.

Long Septemba 1916, i gat 264 brata we oli raetem wan leta i go long gavman, blong talem se bambae oli no joen long ami. Gavman i letem 5 long olgeta blong oli no joen long ami, mo i talem long 154 long olgeta se oli mas "mekem ol wok we oli impoten long kantri," olsem wokem ol rod, no sam narafala strong wok olsem. Mo gavman i givim oda long 23 long olgeta blong oli joen wetem wan grup blong oli mekem sam wok we oli no laenap wetem faet. Mo gavman i putum 82 long olgeta long han blong ol ami, mo sam narafala oli pas long kot blong ol ami from, we oli no wantem joen long faet. Plante man oli toktok from ol trabol we ol brata ya oli kasem long kalabus, ale gavman i tekemaot olgeta mo i sanem olgeta oli go mekem ol strong wok long ol kamp.



Henry Hudson



James Frederick Scott



Pryce Hughes



Kalabus ya Dartmoor,
we plante Baebol Studen
oli stap long hem



Herbert Senior

Long ples ya Wales, Edgar Clay, mo Pryce Hughes we biaen i wok long branj ofis long Briten, tufala i wok blong bildim wan stonwol blong blokem wan reva. Long saed blong Herbert Senior, we hem i wan long ol 8 brata ya we oli bin sanem olgeta oli go long Franis mo afta oli kambak, hem i go long kalabus ya Wakefield, we i stap long Yorkshire. Ol narafala brata oli stap mekem ol strong wok long rabis kalabus ya Dartmoor. Bighaf blong ol man we oli stap long rabis kalabus ya from we tingting blong olgeta i no letem olgeta blong oli faet, hemia ol brata blong yumi.

Frank Platt i wan Baebol Studen we i agri blong joen long wan grup we oli mekem sam wok we i no joen wetem faet. Wan taem, hem i kasem oda blong hem i go faet, be hem i no wantem go, ale ol soldia oli mekem i nogud tumas long hem, mo oli kilim hem nogud. Atkinson Padgett i joen long ami, be smoltaem afta, hem i kasem save long trutok ale hem i no wantem go faet. From samting ya, ol haeman blong ami oli kilim hem nogud.

Nating se ol brata blong yumi long taem ya, oli no kasem save fulwan se from wanem yumi ol Kristin yumi no mas joen long faet, be oli traehad blong mekem Jehova i glad long olgeta. Olgeta ya we yumi tokbaot nem blong olgeta, oli soemaot wan gudfala eksampol long fasin blong no joen long faet, speseli 'taem trabol i kamtru.' (Rev. 3:10)—Stori ya i kamaot long ol buk mo pepa we ol brata oli kipimgud long Briten.



Frank Platt



Yu save daonlodem
magasin ya mo sam
narafala buk bakegen
long www.jw.org
(I fri nomo)



Mo tu, yu save
ridim Baebol ya
New World Translation
long Intenet, long
Franis mo Inglis

Yu skanem
code ya,
no yu go long
Websaet ya
www.jw.org



w13 05/15-LM